

經

大方等大集經

二十六卷  
三十二卷

國

C40

4514

31

C 40-4574

了翁上座請大藏及百  
家菩薩置於別業雲山  
我微笑塔院度府中未  
為字者不敢許出院內  
當山二世鐵牛機謹誌



B 64853

大方等大集經卷第二十六

北涼天竺三藏曇無讖譯

虛空目分中寶髻菩薩品第十一之一

爾時世尊故在欲色二界中間大寶坊中坐師子座  
放大光明猶如日月得大自在猶如梵釋功德高顯  
猶須彌山法界甚深猶如大海於大眾中演說正法  
初中後善字義真正具足清淨班宣梵行爲諸菩薩  
淨於法印令諸菩薩聞已修習爾時東方過九萬二  
千諸佛世界彼有世界名曰善華其土有佛號曰淨  
住如來應正遍知明行足善逝世間解無上士調御

經

大方等大集經卷第二十六

三

國六

丈夫天人師佛世尊爲化衆生宣說正法有一菩薩  
名曰寶髻與諸菩薩其數八千發彼世界欲來此土  
齋妙寶蓋欲奉如來其蓋周覆一千世界及諸香華  
欲供養佛妙音說偈讚歎如來

若諸人天得觀佛 則爲獲得大利益  
如來所受苦無量 勤精進故得菩提  
往昔精進修菩提 超過一切諸菩薩  
爲令衆生得利益 故轉無上正法輪  
如來如是難得見 所說正法亦難聞  
獲得人身亦復難 諸根具足亦如是

若諸衆生行不善 亦不能作三善業  
若人欲得大利益 應當觀見釋天尊  
若欲聽受無上法 并見十方諸菩薩  
具足三十二妙相 應當速詣大寶坊  
今若不種諸善根 後必不得大涅槃  
若欲具足人身者 應當速詣娑婆界  
若欲破壞三惡道 欲受人天微妙樂  
獲得無上無比樂 應當詣於娑婆界  
大醫今施甘露味 除滅衆生諸煩惱  
如來商主大法王 今日演說無上界

寶髻菩薩說是偈時其聲遍滿大千世界時舍利弗聞是偈已卽白佛言世尊如是偈音何處演說佛言舍利弗東方過於九萬二千諸佛世界彼有世界名曰善華其土有佛號曰淨住彼有菩薩名曰寶髻與八千菩薩俱欲來此是其所說其聲聞於大千世界勸諸衆生令修善法爾時寶髻菩薩與八千菩薩及無量人天來至佛所頭面禮拜白佛言世尊善華世界淨住如來致敬問訊起恭敬利氣力安不眷屬大衆樂受法不世尊我從彼來至此世界爲聽菩薩淨行法印唯願如來普爲一切大慈憐愍分別解說令

諸菩薩聞已修習破壞一切煩惱習氣修菩薩行了知一切衆生之心能修菩薩所有行相能得解了智慧之行能知一切煩惱等行能修菩薩所修法行能深觀察一切罪過身得無礙見一切佛佛言善哉善哉善男子諦聽諦聽我今當說如是淨行十分之一善男子菩薩摩訶薩有四行何等爲四一者波羅蜜行二者助菩提行三者神通行四者調衆生行波羅蜜行者是願方便助菩提行者是修道方便神通行者是調心方便調衆生行者是菩提心堅固方便善男子云何名檀波羅蜜檀波羅蜜卽是淨行能壞癡

心能修捨心修捨心已能一切施若有菩薩能一切  
施卽得四種無分別心何等爲四一者不分別衆生  
二者不分別法三者不分別心四者不分別願是名  
爲四不分別衆生者是可與是不可與此多與此少  
與此上與此下與此恭敬與此輕慢與此全與此半  
與此持戒此破戒此福田此非福田此得大報此不  
得大報此是正見此是邪見此行正聚此行邪聚善  
男子菩薩摩訶薩得如是心名不分別心無憍慢心  
無上下心無罣礙心是平等心真正之心平等施戒  
等慈等悲無有分別猶如虛空是名不分別衆生不

分別法者菩薩終不作此分別受者爲說不受不說  
受法者施其所須不受法者則不供給終不觀察凡  
夫之人不可惠施賢聖之人則應布施是名不分別  
法不分別心者觀諸衆生心皆平等不爲報施無內  
外貪非爲名施不求果施所愛之物施已不悔爲攝  
衆生故行惠施是名不分別心不分別願者施時不  
爲得帝釋身梵王之身轉輪王身魔身長者大臣之  
身亦復不爲大自在故大眷屬故不爲上有不爲聲  
聞辟支佛乘乃至不爲阿耨多羅三藐三菩提故而  
行布施是名不分別願善男子菩薩摩訶薩修惠施

時具足成就如是四事則得遠離八不正見一者我見二者衆生見三者壽命見四者士夫見五者常見六者斷見七者有見八者無見是名爲八復得遠離四種功德一者凡夫功德二者聲聞功德三者緣覺功德四者餘習功德如是施已不觀四相一者常相二者樂相三者我相四者淨相能淨四法一者淨身二者淨口三者淨心四者淨願遠離三礙一果報礙二聲聞礙三悔心礙善男子菩薩修行如是施時遠離三畏一者懦弱畏二者上慢畏三者魔業畏菩薩修行如是施時具四種印一者內空印二者外空印

三者衆生空印四者菩提空印如是施時具四精進一者滿衆生故具足精進二者護佛法故具足精進三者爲具三十二相八十種好故具足精進四者淨佛土故具足精進是時復得具足四念一者念菩提心二者念欲見佛三者心常念慈四者念離煩惱如是施時淨於三事一者自身二者他身三者菩提如是施時淨於四智一者界智二者衆生滿足智三者願智四者助菩提智善男子菩薩若能行如是法則能淨於檀波羅蜜善男子云何菩薩淨尸羅波羅蜜行善男子有一種淨所謂菩薩憐愍一切世間衆生

勝於聲聞辟支佛慈能壞魔業調諸眾生具足無量功德寶聚無有放逸復有二種一者於諸眾生不生惡心二者調諸眾生令向善提復有三種一者淨身遠離一切身惡業故二者淨口遠離一切口惡業故三者淨意遠離一切貪恚邪見故復有四種一者勸諸眾生令持禁戒二者勸諸眾生具足淨戒三者能調諸毀戒者四者見持戒者供養恭敬尊重讚歎復有五種一持戒已不生憍慢二見毀戒不生輕慢三見持戒心無嫉妬四終不求聲聞之乘五者不念辟支佛乘復有六種一者念佛爲過戒故二者念法爲

過戒已心不生悔三者念僧爲能具足如來戒故四者念戒爲不求有諸果報故五者念施爲能一切悉施與故六者念天爲欲具足諸善法故復有七種一者深信一切佛法二者勤行精進爲得佛法故三者具智爲知一切諸佛法故四者聞已能說一切佛法故五者供養父母師長和尚六者畏於現在未來惡業七者有慚愧心復有八種一者不爲利養顯異惑衆二者不說自事離一切故三者不讚供養心知足故四者行聖種性樂善法故五者修頭陀法不惜身命故六者樂於寂靜離說世事故七者深心樂法狀

三界故入者至心護法不惜命故復有九種一者離九惡心過九衆生所居處故二者念淨三者念修四者增長善法五者心樂寂靜六者離煩惱熱七者莊嚴舍摩他八者勤行精進九者不欺衆生復有十種一者淨身三業二者淨口四業三者淨意三業四者遠離嫉妒五者離諂曲心六者至心念戒七者爲持戒故勤行精進八者軟語爲調衆生九者受身爲衆生使十者於諸福田不生輕慢善男子菩薩修行尸波羅蜜有二種淨行一者有心有相及以莊嚴寧捨壽命終不毀戒二者無心無相及無莊嚴於一切法

心無所著復有二種一者淨於人二者不求一切外入復有二種一者常願菩提之心二者不觀本向菩提戒相善男子云何菩薩淨羸提波羅蜜行善男子菩薩摩訶薩受罵不報口業淨故受打不報身業淨故受瞋不報意業淨故善男子菩薩摩訶薩雖受罵辱所以不誚護衆生故受諸楚毒所以不報護後世故被截手足慈心不瞋護菩提故見有求者心不生瞋爲四攝故生慈心故增菩提道故壞慳貪故破廢業故善男子菩薩摩訶薩修念佛已行於忍辱受一切苦爲得佛身故善男子復有菩薩修於忍辱爲

欲具足得十力故復有菩薩修於忍辱爲欲成大師  
子吼故復有修忍爲知三世無罣礙故復有修忍爲  
得大慈大悲力故復有修忍爲得具足一切智故善  
男子菩薩摩訶薩具足二力能成就忍一者智力二  
者修力以智力故觀於身心是故爲忍以修力故不  
著諸法是故爲忍復次善男子淨忍菩薩則能觀察  
一切法中無有衆生是故修忍一切諸法其性解脫  
是故菩薩觀一切法無忍無瞋若於諸法心無所著  
是名爲忍善男子菩薩有二忍一者觀如法身二者  
觀如法界菩薩摩訶薩若能如是觀二法者是名善

薩淨羸提波羅蜜行善男子云何菩薩淨毗梨耶波  
羅蜜行若菩薩摩訶薩於諸修行不息不悔於諸善  
法心無厭足亦樂修行五波羅蜜常求莊嚴一切善  
法擁護正法樂宣說之調伏衆生心無休息過於聲  
聞辟支佛乘擁護一切諸佛正法修諸苦行其心不  
悔終不喪失本昔善根廣修多聞心無厭倦爲衆走  
使不生愁悔是名精進如是精進云何名淨若能觀  
身猶如影像口無言說心畢竟淨以盡智觀諸法以  
無生智知諸有盡如是觀時則能莊嚴三種精進一  
者體莊嚴二者覺莊嚴三者分別莊嚴復有三種不

著精進一不著眼二不著色三不著識乃至法識亦  
復如是是名不取不捨精進具足如是勤精進已不  
取惠施不捨慳貪不取持戒不捨毀戒不取忍辱不  
捨瞋恚不取精進不捨懈怠不取禪定不捨亂心不  
取智慧不捨愚癡不取善法不捨惡法不取佛道不  
捨二乘是名二種勤精進也是二精進能具佛法復  
有二種所謂內外若有菩薩能修如是勤精進者是  
名毗梨耶波羅蜜行淨善男子云何菩薩淨禪波羅  
蜜行若有菩薩摩訶薩取諸禪支觀諸禪支觀已入  
定既入定已不貪著色受想行識是名爲禪非著眼

禪乃至意禪是名爲禪非著色禪乃至法禪是名爲  
禪非著地水火風空禪是名爲禪非著日月釋梵自  
在天禪是名爲禪非著欲界色無色禪是名爲禪非  
著此彼禪是名爲禪非觀身心禪是名爲禪非著上  
下禪是名爲禪非著四取禪是名爲禪非著衆生壽  
命士夫我人相禪是名爲禪非著常見斷見有無見  
禪是名爲禪非畢竟盡漏禪是名爲禪非入定聚禪  
是名爲禪非得沙門果禪如是禪者非畢竟行禪名  
空調伏禪非真空禪名無相調伏禪非真無相禪名  
無願調伏禪非真無願禪是名菩薩具足成就大慈

大悲一切空行禪云何名爲具一切空若能不觀布施持戒忍辱精進禪定智慧方便慈悲喜捨四諦菩提智慧誓願莊嚴舍摩他毗婆舍那解脫慚愧是名諸佛方便三昧神通無礙智攝取十力四無所畏十入不共法不爲二乘之所染汗斷諸習氣具足無量大神通智爲諸衆生之所歸依莊嚴世法及出世法能善調伏一切衆生度於四流生死大海能斷一切所有繫縛淨諸法性是名性寂靜非向法寂靜亦取向法捨性了了向法盲性有聞向法聾性勤調伏向法停住消滅寂靜調伏熾然是名一切行空善男子

譬如三千大千世界所有衆生悉善知畫其中或有善能泥塗或有磨采或曉畫身不曉手足或曉手足不曉面目時有國王以一張氎與是諸人而告之言凡能畫者悉來聚集於此氎上畫吾身像爾時諸人悉來聚集隨其所能而共作之有一畫師以緣事故竟不得來諸人畫已持共上王善男子可言諸人悉集作不不也世尊善男子我說此喻其義未顯善男子一人不來故不得言一切集作亦不得言像已成就佛法行者亦復如是若有一行不成就者不各具足如來正法是故要當具足諸行名爲成就無上菩

提說是法時六萬菩薩於一切行得具足空善男子  
云何菩薩摩訶薩淨般若波羅蜜行善男子菩薩摩  
訶薩具十二慧一者知過去無礙二者知未來無礙  
三者知現在無礙四者知有爲無礙五者知無爲無  
礙六者知一切世作無礙七者知出世無礙八者辯  
才無礙九者知實無礙十者知世諦無礙十一者知  
第一義諦無礙十二者知諸衆生利鈍無礙是名爲  
慧難破能破難觀能觀難解能解譬如金剛不可沮  
壞是名出世之慧畢竟慧一切衆生真解心慧難行  
難入難見甚深難可習學正見正聚遠離諸見及以

習氣自知了了知見一切衆生之心法智義智無所  
貪著曠大光明無諍無近善知時節過於時節正聚  
護正聚畢竟覺正覺實覺遠諸垢穢不爲一切之所  
呵責一行無行一切衆生行無足跡行雖離一切世  
間之行亦不遠離一切世行雖離世界不離佛土雖  
離一切諸行莊嚴亦不遠離調伏衆生雖離諸行不  
離善行雖離衆生心行因緣不離知於衆生心行雖  
離世行不離世法雖離諸身亦入衆生心是名爲慧  
如是智慧甚爲難得非善根純熟終不能獲不能常  
修行善法者亦不能得如是智慧菩提樹下乃能得

之真如法性諸佛所護度至彼岸知一切法施甘露  
味是故名爲般若波羅蜜善男子如是智慧畢竟了  
知一切緣一切相一切衆生心之所行以是義故名  
爲智慧如是智慧有二寂靜一者知礙相寂靜二者  
知無礙相寂靜復有二種一者無覺淨二者離諸見  
淨如是智慧菩薩摩訶薩常遊衆生利鈍根中衆生  
心中一切法中觀諸煩惱卽是智慧菩薩雖住諸界  
多住佛界能善觀見十方世界離一切葢悉是一切  
佛法根本具足一切無上佛法不學諸法不離諸法  
不壞一法不成一法菩薩成就如是智慧能作功德

能讀誦說一切佛法一切福德悉能得之皆能修成  
一切善法故名菩薩淨般若波羅蜜行說是法時二  
萬二千衆生發阿耨多羅三藐三菩提心八千菩薩  
得無生忍五百比丘漏盡意解十千人得須陀洹  
果爾時一切天與人同聲而言世尊若有人能信是  
法者當知此人諸佛所護何況有能受持讀誦書寫  
供養善男子云何菩薩摩訶薩淨助菩提行善男子  
菩薩摩訶薩觀身念處有二種行一者不淨行二者  
淨行不淨行者觀身不淨臭穢充滿無常無住誑諸  
凡夫淨行者菩薩摩訶薩作是思惟我今因是不淨

續  
之身得淨佛身得淨法身淨功德身一切衆生所樂  
見身復次善男子菩薩摩訶薩觀身身已能淨二行  
一者無常二者常菩薩摩訶薩觀身無常必定當死  
如是觀已不爲身故造結惡業邪命自活修三堅法  
一者身堅二者命堅三者財堅如是觀已能爲衆生  
而作給使卽得遠離身口意曲菩薩如是觀身無常  
得如是等無量功德云何爲常菩薩摩訶薩觀無常  
已則得常身因無常故得功德身因無常故不斷佛  
種法種僧種善男子又復常者卽是無盡無盡者卽  
是無爲無爲者卽是一切智所行處一切智所行處

者卽是空無相願又復常者卽是虛空菩薩摩訶薩  
觀一切法猶如虛空是名菩薩摩訶薩常行善男子  
復有菩薩修身念處觀察一切衆生之身畢竟當是  
如來佛身如如來身法身亦爾如是二身我身亦爾  
是名菩薩觀無漏身菩薩爾時所得善法隨其多少  
悉是無漏以如是法發願迴向一切種智得無漏已  
終不起漏所言漏者卽是三漏所謂欲漏有漏無明  
漏菩薩了了知三漏已爲衆生故生於欲界亦復不  
爲欲漏所汙色無色界亦復如是無明漏者已拔其  
根何以故拔無明故則無見漏菩薩摩訶薩修身念

已於是身中不見我及我所不生憍慢離我所故  
不求不取一切財物不求取故於物無諍以無諍故  
卽是寂靜夫寂靜者卽是忍辱住於忍辱不上不下  
不上下者則如法住如法住者不行善法不行惡法  
不上下已卽得善友得善友已遇善知識遇善知識  
故得聞正法聞正法故不以漏心向有漏法是名過  
於諸漏境界過漏境已當入禪定旣入定已乃至一  
法不生覺觀無覺觀故不作一法不變一法是名如  
法是名一切法平等若得如是諸法平等是名一切  
智善男子菩薩摩訶薩若能如是觀身念處是名觀

身身念善男子菩薩爾時次觀受念處於有受者生  
慈悲心向諸衆生作如是言畢竟樂者斷一切受若  
人能斷一切受者卽是常樂菩薩爾時隨所受者生  
慈悲心若自若他受樂受時遠離愛心生於慈心若  
受苦時遠離瞋心生於悲心若受不苦不樂離無明  
心生於捨心是故菩薩受樂受時不生貪著受苦受  
時不生瞋恚受不苦不樂受時不生無明菩薩爾時  
觀一切受無常苦無我見受樂者卽知是苦見受苦  
者如癱如瘡見不苦不樂受是不寂靜觀於樂受卽  
是無常觀於苦受卽是空無不苦不樂卽是無我善

薩爾時作是觀已見是諸受卽是無受見一切受卽是有爲若是有爲卽是生滅散漏無住如是觀已不見於我不見受者是名菩薩大智方便因是方便見一切受無常生滅觀一切法悉是空無無受受者無作作者從緣而生從緣而滅無屬無取於諸因緣不生覺觀因無覺觀作如是言諸因緣法皆悉是空菩薩摩訶薩如是觀時成受念處能令身心皆悉寂靜知一切行是名一切智是名修受念處云何菩薩修心念處菩薩摩訶薩住菩提心觀是心性不見內入心不見外入心不見內外入心不見陰中心不見

界中心旣不見已作是思惟如是心緣爲異不異若心異緣則一時中應有二心若心卽緣不應復能觀於自心猶如指端不能自觸心亦如是作是觀已見心無住無常變異所緣處滅卽知是心非從緣生非不緣生非常非斷非內非外非有非無觀心如是不妨如法知心寂靜是名菩薩修心心念復次善男子菩薩摩訶薩觀心非色不可觀見非是覺觀是名菩薩修心心念處如心心數亦如是如心心數心行亦如是如心行心所求法亦如是如所求法菩提亦如是如菩提一切善法亦如是菩薩若觀心如獼猴晝水朝

露峰王魚母如河如焰如想遠事獨行無身常轉無  
停貪著諸界次第生滅能攝如是無量之心令住一  
處不動不轉不漏不錯不亂不散是名舍摩他菩薩  
若能作如是觀是名成就觀心心念處是名知心境  
界是名知心法界是名知心真實之相是名知心真  
實之性卽是廣知卽是淨知了知真知實知如幻是  
名知法名知心性名知心盡名無取知無罣礙知菩  
薩摩訶薩如是觀已善知一切衆生心性知已知應  
而爲說法如知是心性知一切衆生心性亦復如是  
如知自心相知一切衆生心相亦復如是如知自心

空知一切衆生心空亦復如是如觀自心平等觀一  
切衆生心平等亦復如是作是觀已不動法界是名  
菩薩修心心念處善男子云何菩薩修法念處菩薩  
摩訶薩作如是觀法出法滅無我衆生壽命士夫無  
生無滅無沒無出是名法性若能求法是名出法若  
不求法是名滅法若善不善出者從緣滅者從緣如  
是觀時觀於三行所謂惡行善行不動行是三行中  
我當常行極善之行爲十善法十善法者爲淨身業  
欲求如來三十二相八十種好他不能害淨口業者  
凡有所說衆樂聽受淨心業者於諸衆生其心平等

常入禪定淨四無礙智淨慈心故施衆生常樂淨悲  
心故無量世中爲衆生受苦其心不悔淨於十力爲  
知衆生諸根利鈍淨四無畏爲知衆生障無障故淨  
十八法爲知三世無障礙故淨一切佛法爲一切衆  
生無能勝故菩薩摩訶薩能如是觀於諸善法及諸  
功德不生厭足親近善行遠離惡行及煩惱習真實  
了知於不動行雖知不貪心得自在隨願往生非結  
業生生於欲界爲衆生故善男子菩薩摩訶薩得善  
方便觀法念處修習莊嚴助菩提法遠離一切障菩  
提垢得是功德不著常見不著斷見離是二見行於

中道夫中道者有二種法一者不善念二者無明是  
二法中心不放逸是名中道復有二法一行二識復  
有二法一者名色二者六入復有二法一觸二受復  
有二法一愛二取復有二法一有二生復有二法一  
老二死是三法中不放逸者是名中道如是中道世  
間智慧所不能見不可宣說不可顯示無有相貌無  
色無處無取無捨清淨寂靜善男子夫中道者不可  
眼見乃至不可觸觸亦無至處亦世出世不可宣說  
非多非少故名中道善男子我與無我名爲二邊若  
有說言非常非斷非命非士非想非非想非覺非非

覺非實非虛非此非彼非有非無非有爲非無爲非  
行非非行非生死非涅槃不作如是是名中道復次  
善男子菩薩摩訶薩觀法法念不分別法界如法界  
衆生界亦如是如是二界名虛空界一切諸法悉入  
法界夫法界者卽衆生界衆生界者卽無分別是名  
觀察一切法等見一切界卽是法界雖明了見而心  
不著以不著故則無分別菩薩摩訶薩不以肉眼天  
眼慧眼觀法念處何以故如是三眼無相貌故是故  
觀法則以法眼雖了了知而心不著雖復不著不失  
法界是名佛智能知如是甚深法界亦不失於一切

智念是名菩薩修法法念處善男子菩薩摩訶薩何  
故修習是四念處爲欲遠離四顛倒故修身念處爲  
離淨倒修受念處爲離樂倒修心念處爲離常倒修  
法念處爲離我倒又離四食修身念處離於揣食修  
受念處離於觸食修心念處離於識食修法念處離  
於思食又復遠離識四住處修身念處離住色處修  
受念處離住受處修心念處離住想處修法念處離  
住行處復離五陰修身念處遠離色陰修受念處遠  
離受陰修心念處遠離陰修法念處離想行陰是  
名菩薩淨四念處行善男子云何菩薩淨四正勤行

菩薩摩訶薩常樂修習一切善法未生惡法爲不生  
故勤行精進已生惡法爲遠離故勤行精進未生善  
法爲令生故勤行精進已生善法爲住不失故勤行  
精進善男子菩薩摩訶薩於無量世修習善行是故  
性善不以方便令惡不生若有菩薩修四正勤心得  
自在正勤者菩薩爾時心及心數與大慈悲和合共  
行故名正勤菩薩爾時次第修習四如意足一者欲  
二者心三者進四者慧專念至心念於菩提是名爲  
欲修大悲故覺心輕便是名爲心遠離惡法是名精  
進得方便故名之爲慧菩薩修四如意足已得四自

在一者壽命自在以自在故雖生短命自得長壽爲  
調眾生與長壽者演說正法於長壽中能現短壽隨  
是菩薩所生之處若天若人得命自在二者身得自  
在以自在故隨心作身隨心作色示現威儀爲眾生  
故菩薩若欲與諸眾生其身同等高大微小悉皆能  
作三者得法自在以自在故能知一切世出世法示  
諸眾生一切世事於出世行心亦不退明知甚深十  
二因緣得無礙智能爲眾生說種種法無量眾生聞  
是法已發阿耨多羅三藐三菩提心四者願得自在  
以自在故令四大海合作一海不來不去無有動轉

如本無異亦令三千大千世界諸須彌山合爲一山  
不來不去無有動轉如本不異於四天王三十三天  
無所妨礙欲令三千大千世界悉作金寶七寶栴檀  
華香瓔珞虛空水火皆隨意成是名菩薩得四自在  
善男子菩薩若得四如意足則得面見十方諸佛與  
共語言進止一處一切梵天帝釋四王阿修羅乾闥  
婆迦樓羅緊那羅摩睺羅伽亦復如是云何莊嚴四  
如意足善男子若能供養父母和尚師長有德見諸  
衆生先意問訊柔輒與語如語而作視諸衆生其心  
平等善心正心恭敬心慚愧心遠離貪欲瞋恚愚癡

無欺無貪無妒無慳營他事業如已所作無勢力者  
助其力勢泥塗之處薦治土石河澗溝渠造作橋梁  
或以身負或施船濟常施衆生所須之物口不說他  
衰惱之事亦不譏刺他所犯罪有犯罪者能如法除  
遮諸煩惱令不生起所重之物能以施人旣施之後  
心不生悔爲諸衆生發願迴向信心以善勸諸衆生  
不惜身命少欲知足於他利養心無怖望常念出家  
亦勸衆生念善知識心無捨離於怨親中平等無二  
以種種乘施行路者羸乏之人施牀臥具有恐怖者  
能爲救護視諸衆生如父母想不輕毀戒施貧財物

有病瘦者給其醫藥施恩於他不自稱說終不斷絕  
三寶種性常念無爲遠離世事一切諸惡不善之法  
不爲世法之所染汚不失菩提至心之念是名莊嚴  
淨四如意足行

大方等大集經卷第二十七

北涼天竺三藏曇無讖譯

虛空目分中寶髻菩薩品第十一之二

云何菩薩淨五根行菩薩信心不可動轉名爲信根  
不由他教而行精進名精進根常念菩提名爲念根  
常修大悲名爲定根攝取善法名爲慧根復次信諸  
佛法名爲信根求諸佛法名精進根念諸佛法名爲  
念根得佛三昧名爲定根斷諸疑網名爲慧根復次  
心向善提無有疑網名爲信根增長善法名精進根  
求善方便名爲念根視諸衆生其心平等名爲定根

觀諸眾生上中下根名爲慧根復次心淨無濁名爲  
信根壞衆濁心名精進根念清淨法名爲念根觀心  
性淨名爲定根能令衆生住清淨法名爲慧根復次  
遠離一切弊惡之法名爲信根求諸善法名精進根  
得已不失名爲念根既得善法如法而住名爲定根  
思惟善法不善無記名爲慧根復次信根者卽是施  
心精進根者卽是樂施無有休息念根者旣施之後  
不求果報定根者卽平等施心無分別慧根者不觀  
福田及非福田復有信根卽是初入善法之心精進  
根者能壞憍慢念根者離我我所定根者遠離一切

六十二見慧根者遠離一切諸惡煩惱是名菩薩淨  
五行行云何菩薩淨五行善男子菩薩摩訶薩具  
足五根不爲諸魔之所破壞故名爲力一切聲聞辟  
支佛乘所不能及一切衆生不能令其退大乘心一  
切煩惱不能破壞能令其心知足少欲身得大力善  
覆諸根得金剛身是名爲力善男子菩薩摩訶薩住  
信力時終不造作一切諸惡住進力時造一切善住  
念力時不失善法住定力時不爲五欲樂之所壞住  
慧力時遠離一切諸結煩惱復次住信力時不隨他  
語住進力時求善不息住念力時得陀羅尼住定力

時說法平等住慧力時能壞一切衆生疑心復次住  
信力時具得解力住進力時具精進力住念力時具  
解脫力住定力時具足願力住慧力時具諸行力復  
次住信力時見慳罪過住進力時遠離慳貪住念力  
時以所修善廻向菩提住定力時其心平等住慧力  
時心終不求施戒定報復次住信力時能離一切破  
戒之垢住進力時至心具戒住念力時以所持戒願  
向菩提住定力時具清淨地住慧力時遠離作戒復  
次住信力時遠離瞋心住精進力修習忍辱住念力  
時以所修忍願向菩提住定力時護諸衆生住慧力

時不觀衆生士夫壽命復次住信力時遠離懈怠住  
進力時所修諸行到畢竟岸住念力時所修精進願  
向善提住定力時身心寂靜住慧力時不作善惡復  
次住信力時遠離一切忽務之事住進力時勤求禪  
支住念力時以所修定願向善提住定力時其心常  
定住慧力時不著諸定復次住信力時遠離無明住  
進力時勤求諸善住念力時以所修智願向善提住  
定力時修善思惟住慧力時如法而住復次住信力  
時具足七力住進力時得住七覺住念力時得八念  
處住定力時離七識處住慧力時離八邪支復次心

於菩提無有退轉是名信力淨信力行不取不捨是  
名進力淨進力行修四念處是名念力淨念力行調  
伏於心是名定力淨定力行遠離諸見知善方便是  
名慧力淨慧力行善男子云何菩薩淨七覺行終不  
失於助菩提法名念覺分不取不捨舍摩他名擇覺  
分離一切惡名進覺分離諸愁惱名喜覺分身心寂  
靜名除覺分得解脫味名定覺分所作已辦名捨覺  
分復次不捨菩提心名念覺分至心護法名擇覺分  
調諸眾生無有休息名進覺分具足善法名喜覺分  
離諸煩惱名除覺分能令眾生住三昧中名定覺分

令諸眾生悉知法相名捨覺分復次不念聲聞辟支  
佛乘名念覺分分別一切法字句義名擇覺分求善  
法時三業不息名精進覺分離怨親心名喜覺分如  
法而住名除覺分隨諸世間而能調伏名定覺分不  
觀二法名捨覺分善男子助菩提者覺一切法知一  
切法分別諸法籌量諸法知諸眾生心性心行是名  
菩提分亦名聖行如是聖行非是一切凡夫魔眾邪  
見所行非是色聲香味觸行非一切相一切受諸心  
意識見聞覺知有想無想一切法行故名聖行夫聖  
行者非覺非非覺亦非大覺而能對治一切諸法然

復不與諸法諍訟是名聖行聖行者卽是佐助菩提之法善男子云何菩薩淨入道行八道者所謂正見云何正見正見者見一切法悉皆平等如是正見不名空見何以故自有正見非是空見如是二見亦名同見復有我見衆生見空見不名正見如是三見亦復同見又衆生見命見空見不名正見如是三見亦復同見又有我見斷見空見不名正見如是三見亦復同見又有有見無見空見不名正見如是三見亦復同見復有四見佛見法見僧見空見是名正見如是四見不名空見善男子若有人著如是見者不名

正見若不著者乃名正見何以故夫正見者無一分別平等無二云何名爲平等見耶若作是念凡夫法下學法爲上如是名爲非平等見凡夫法漏學法無漏凡夫法食緣覺無食凡夫法垢菩薩法淨凡夫有爲佛是無爲如是見者非平等見若能觀察凡夫之法乃至佛法無有差別乃名平等若能觀見凡夫法空至佛法空是名正見觀凡夫法從因緣生辟支佛法亦從緣生乃名正見若觀凡夫法寂靜菩薩法寂靜是名正見若觀凡夫法不具足乃至佛法亦不具足是名正見若觀我與無我無有差別無差別見乃

名正見若如是見則不見於上中下法於一切法亦無覺觀是名正見正見者名無所見無所見者卽是正見若如是見是人乃至不見一法一法相貌一法光明善男子若如是見是名佛法之正見也說是法時五百比丘得阿羅漢果善男子云何正覺正覺者離一切覺覺者名爲智慧方便觀法知法是名正覺觀察諸法何者是垢何者是淨如是觀已都不覺知等與不等離一切覺是名正覺云正語口所出言不自焦惱亦不焦他不自污辱亦不汙他不自生慢不生他慢不自誑惑不誑惑他是名正語復次正語凡

有所說說一切法皆悉平等善能分別有爲之相是名正語復次正語說一切法空無相願無生無滅無出無沒是名正語復次正語說有爲苦無常無我涅槃寂靜是名正語若有衆生說言衆生一切無有壽命士夫一切諸法從因緣生從因緣滅猶如子果是名正語淨正語者卽是佛語是名淨正語行云何正業正業者若業雖能壞一切業亦不名業若業能作寂靜之因不增不減能壞煩惱不令增長是名正業知業如是猶作善業亦觀諸業皆悉空寂無有堅實是苦無樂是名正業云何正命正命者若命不妨自

身他身不增一切諸惡煩惱非惡業活是名正命菩薩摩訶薩於諸衆生淨於正命以是正命願向菩提是名正命如是正命能利自他正精進者勤作方便求諸善法欲心不息無有厭悔是名精進推求諸法平等之性亦不觀法等與不等不作非不作了知於如法性實性名正精進宣說正法令諸衆生離邪精進亦知衆生所修行行是名正精進云何正念若念施戒忍辱精進禪定智慧四無量心是名正念復有正念攝諸煩惱不令妄起不近一切惡魔諸業不墮惡道不起惡心常修一切正善之法遠離一切邪惡

之法是名正念菩薩住是正念之中獲得正聚沙門正果是名正念云何正定修行聖行知苦離集證滅修道是名正定復有正定觀一切法皆悉平等若觀我淨一切亦淨若觀我空一切亦空雖作是觀不入正位是名菩薩之正定也菩薩摩訶薩住於定中於一念頃得一切智是名正定說是法時萬六千天與人發阿耨多羅三藐三菩提心善男子云何菩薩淨神通行善男子天眼五種悉能觀見十方世界及見十方世界諸佛亦見衆生出生退沒所見十方無有罣礙勝於一切聲聞緣覺及諸天人菩薩具足如是

五事則能了了見一切法是名菩薩淨天眼行菩薩  
摩訶薩得天耳通聞五種聲人聲非人聲地獄聲十  
方諸佛說法之聲一切衆生語言音聲是名菩薩淨  
天耳行云何菩薩淨他心智行知他心智亦有五種  
悉知一切人天之心地獄餓鬼畜生等心知過去心  
知未來心知現在心是名菩薩淨他心智行復有他  
心智知是衆生是正定聚是邪定聚是不定聚知是  
衆生有貪恚癡既了知已隨應說法衆生聞已得壞  
煩惱是名菩薩淨他心智行云何菩薩淨宿命智行  
了知是身從貪恚癡因緣而生了知是身從施戒忍

精進定慧慈悲喜捨因緣而生了知是身具足不具  
足了知是身因無明愛及四倒生了知是身施因緣  
故具足財物及以眷屬如是等智是名菩薩淨宿命  
智行云何菩薩淨神通行神通行者亦有五種一者  
示色二者解種種語而爲說法三者善能了知心意  
識等四者能覺諸法說一切法是名菩薩淨神通行  
善男子如是五神通爲漏盡故菩薩修習而不盡漏  
爲欲了知一切諸法何以故調衆生故善男子譬如  
一城縱廣一由旬多有諸門路險黑闇甚可怖畏有  
入城者多受安樂復有一人唯有一子愛念甚重遙

聞彼城如是快樂卽便捨子欲往入城是人方便得過險道到彼城門一足已入未舉一足卽念其子尋作是念我唯一子來時云何竟不與俱誰能養護令離衆苦卽捨樂城還向子所善男子菩薩摩訶薩亦復如是爲憐愍故修習五通旣修習已垂得盡漏而不取證何以故愍衆生故捨漏盡通乃至行於凡夫地中善男子城者喻於大般涅槃衆多諸門者喻於八萬諸三昧門路險難者喻於魔業到城門者喻於五通一足入者喻於智慧一足未入者喻於菩薩未證解脫言一子者喻於五道一切衆生願念子者喻大

悲心還子所者喻調衆生能得解脫而不證者卽是方便善男子菩薩摩訶薩大慈大悲不可思議寶髻菩薩白佛言世尊如佛所說大慈大悲不可思議實如聖教不但慈悲不可思議善方便力亦不可思議菩薩了了自知當得阿耨多羅三藐三菩提而不證之爲衆生故行於生死不爲生死之所汙染世尊菩薩摩訶薩具何等法在生死中心不厭悔善男子菩薩摩訶薩具二十一法在生死中而不生悔一者所修善法共大慈行二者所修慈心共大悲行三者所修大悲共調衆生行四者調伏衆生共精進行五者

所修精進共善心行六者所修善心共方便行七者  
所修方便與慧共行八者所修習慧共禪定行九者  
所修四禪共神通行十者所修神通與智共行十一  
者所修習智與欲共行十二者所修習欲與念共行  
十三者所修習念共菩提心行十四者所修菩提共  
四攝行十五者所修四攝與戒共行十六者所修戒  
禁共多聞行十七者所修多聞共如法住行十八者  
如法共住陀羅尼行十九者陀羅尼共無礙智行二  
十者無礙智共功德莊嚴行二十一者功德莊嚴共  
智慧莊嚴行是名菩薩二十一法在生死中不生獸

悔寶髻菩薩白佛言世尊云何菩薩莊嚴自身亦令  
衆生得大利益佛言善男子菩薩摩訶薩若具多聞  
則名莊嚴爲他演說名大利益復次得大總持名爲  
莊嚴爲他演說名大利益復次無有放逸名爲莊嚴  
調伏衆生名大利益復次三十二相名爲莊嚴具大  
智慧名大利益復次口言柔輒名爲莊嚴說如說行  
名大利益復次能一切施名爲莊嚴不求果報名大  
利益善男子是名菩薩莊嚴自身亦令衆生得大利  
益善男子過去無量阿僧祇劫劫名樂喜彼中有佛  
號一切衆生樂念如來應正遍知明行足善逝世間

解無上士調御丈夫天人師佛世尊其佛世界名曰  
天觀善男子何故彼劫名曰樂喜彼大劫中具有六  
萬諸佛出世彼劫之初首陀婆天唱如是言是劫當  
有六萬佛出衆生聞已心皆樂喜是故彼劫名曰樂  
喜善男子其佛世界莊嚴微妙無有限量快樂妙好  
如天無別是故世界名曰天觀其土皆悉栴檀爲地  
一切無有土沙塵霧其香遍薰無量佛土其地周遍  
出諸蓮華一一諸華有大光明遍照其土其土衆生  
悉得神通足不蹈地乃至無有一人處胎皆悉化生  
一切不聞女人之名亦無受苦三惡道名一切衆生

禪喜爲食其土無有二乘之名一切皆以真金瓔珞  
天冠寶飾而自莊嚴雖無剃髮染衣袈裟而亦得名  
出家之人何以故於一切物捨無貪故彼土如來色  
如梵天現梵天身爲諸菩薩演說法要若他世界有  
諸菩薩見彼佛已受大歡喜善男子彼佛若欲宣說  
法化昇大法座在大衆上七多羅樹常略說法何以  
故一切衆生根猛利故如來所說唯是一句而諸衆  
生解百千句如來常說四淨之法何等爲四一者波  
羅蜜淨二者助菩提淨三者神通淨四者調衆生淨  
時有菩薩名曰寶聚白佛言世尊云何菩薩莊嚴自

身亦令衆生得大利益彼佛答言善男子菩薩若具無礙智者名爲莊嚴能作智明名大利益爾時彼佛說是法時六千菩薩得無生忍時彼菩薩復白佛言世尊云何菩薩莊嚴菩提樹佛言善男子菩薩若能修不放逸是名莊嚴菩提之樹云何名爲不放逸不放逸者名如法住如法住者如說而住復次不放逸者名無量莊嚴無量布施無量持戒無量忍辱無量精進無量禪定無量智慧無量佛法無量調伏無量功德智慧莊嚴供養無量諸佛世尊具智慧故無量多聞爲增智慧故無量修奢摩他毗婆舍那成就如

是無量等法名爲莊嚴菩提之樹亦能疾得阿耨多羅三藐三菩提善男子一切佐助菩提之法以不放逸而爲根本具大莊嚴一切智慧不失一切善法遠離一切煩惱攝取一切諸法於一切法無有罣礙調伏諸根護諸善法不令退失知時非時具足十力四無所畏佛法頂法名不放逸善男子說是法時萬二千菩薩得無生忍爾時寶聚菩薩卽汝身是善男子汝今當知具不放逸菩薩摩訶薩則能莊嚴菩提之樹善男子云何菩薩淨於調伏善男子衆生之行無量無邊不可思議調伏亦爾無量無邊不可思議菩

薩行亦無量無邊不可思議菩薩摩訶薩一心至心  
調伏衆生善男子有諸衆生聞說惠施則得調伏或  
有衆生聞說持戒而得調伏復有衆生聞說施戒而  
得調伏復有衆生輒語調伏復有衆生瞋語調伏復  
有衆生具二種語而得調伏復有衆生聞說身業而  
得調伏復有衆生聞說捨身而得調伏復有衆生勝  
能調伏復有衆生強可調伏復有衆生聞說呵責而  
得調伏復有衆生施時調伏復有衆生劫時調伏復  
有衆生見妙色已而得調伏聲香味觸亦復如是復  
有衆生常親近故而得調伏復有衆生常遠住故而

得調伏復有衆生見佛調伏或有衆生聞法調伏或  
有衆生聞無常法而得調伏苦空無我亦復如是或  
有衆生聞說施聲而得調伏戒忍精進禪定智聲亦  
復如是或有衆生聞說一切有爲無常而得調伏或  
有衆生聞讚人天而得調伏或有衆生聞聲聞乘而  
得調伏辟支佛乘佛乘亦復如是或以四攝而得調  
伏或以三攝二攝一攝而得調伏或復不以四攝之  
法而得調伏或因內施而得調伏外施內外施亦復  
如是或聞宣說地獄中苦而得調伏餓鬼畜生人天  
亦爾或聞純樂而得調伏或聞純苦而得調伏或聞

苦樂而得調伏或有覩見比丘形像而得調伏比丘  
尼優婆塞優婆夷像而得調伏或因種種作倡妓樂  
而得調伏善男子菩薩如是能知種種調伏眾生行  
是名菩薩能行六波羅蜜具足佐助菩提之法具足  
神通調伏眾生善男子若有菩薩具足四法則能調  
伏一切眾生一者心不悔厭二者不貪諸樂三者知  
時非時四者了知諸心復有四法何等爲四一者正  
語二者愛語三者淨語四者如法語復有四法一者  
於諸眾生心無罣礙二者悲心三者利益心四者自  
調諸根復有四法一者淨於自心二者憐愍他心三

者勤行精進四者遠離受樂善男子是故菩薩摩訶  
薩調伏之行無量無邊不可思議善男子過去無量  
阿僧祇劫有劫名愛是中有佛號廣光明如來應正  
遍知明行足善逝世間解無上士調御丈夫天人師  
佛世尊世界名寂靜彼佛具有九萬六千億聲聞衆  
八萬四千諸菩薩衆其土人民壽命十七萬二千歲  
爾時有一大王之子名財功德婆羅門種面貌端正  
衆生樂見年十六時自恃端正而生憍慢初不向佛  
恭敬禮拜爾時如來卽作是念如是王子今將退失  
阿耨多羅三藐三菩提善根不熟若得善友則得詣

佛聞法受持爾時如來卽於八萬四千菩薩大衆之中行籌而言誰能調伏是婆羅門子誰能於是八萬四千年中終常往返是王子家若受衆苦所謂罵打心不生悔八萬四千諸菩薩等乃至無有一人取籌第二第三亦復如是第三唱已有一菩薩名淨精進卽從座起偏袒右肩右膝著地合掌而言世尊我今能詣彼王子家甘心受苦說是語時三千大千世界爲大震動一切人天咸共同聲唱言善哉善哉大士時淨精進菩薩卽便往彼王子門立王子見之惡言皆毀以土塗面刀杖瓦石而加其身菩薩爾時不瞋

不去心不疲厭經一千歲受如是苦過二萬歲乃得至彼第二門下八萬四千年七日未滿方得至其第七門下爾時王子見是菩薩便作是言道士今來何所求索卽於菩薩生不思議心云何是人經爾所時多受衆苦而心不厭第二第三亦如是言道士今來欲何所求爾時菩薩知彼王子心已調伏卽說偈言  
世間所有一切財 金銀瑠璃及玻瓈  
及四供養我不須 唯爲法故來至此  
此世有佛名廣光 爲衆生說無上法  
衆生聞已離煩惱 亦受無量甘露味

諸佛世尊出於世  
今此世出無上尊  
一切衆生常聞行  
自恃財色生憍慢  
一切財寶衆生命  
衆生若聞是甘露  
汝本往昔行菩提  
汝今猶屬諸煩惱  
我今求汝共詣佛  
勤修精進捨國事

甚難於彼靈瑞華  
汝乃放逸沉欲海  
無上如來施慧炬  
而不往詣如來所  
佛說是二悉無常  
不詣佛者名放逸  
請諸衆生許法味  
云何能調諸放逸  
破壞憍慢離煩惱  
令汝終時心不悔

是時王子聞是已  
讚歎恭敬淨精進  
我今捨離國土事  
壞破憍慢至佛所  
八萬四千衆圍遶  
到已卽便奉獻佛  
禮拜合掌心歡喜  
我今歸依淨精進  
雖設多供不能報  
我所修行菩提道

遠離憍慢卽生信  
懺悔先來所加苦  
及以上妙五欲樂  
聽甘露法調衆生  
持妙香華往供養  
破慢至心而聽法  
向佛世尊發是言  
受苦不悔調伏我  
今於佛前至心悔  
以慈悲心調衆生

經  
我更不造放逸心

乃至獲得菩提道

善男子爾時王子卽捨王位在佛法中出家聽法如法而住得無生忍善男子汝知爾時淨精進者豈異人乎莫作斯觀卽我身是財功德者卽彌勒是善男子是故菩薩調衆生行無量無邊不可思議若有菩薩能調衆生是真菩薩所修之業善男子菩薩摩訶薩有四種業一者淨佛國土菩薩業二者淨身菩薩業三者淨口菩薩業四者求一切佛法菩薩業復有四業一者知心二者知根三者知病四者知治爾時寶善菩薩聞是法已卽以髻上真寶之珠價直無量

從無量業之所出生奉獻如來作是誓願我今以是頂寶施佛願此功德爲衆生首因是因緣得無上智爾時世尊卽便微笑是時口中出大光明種種雜色悉能隱蔽一切光明爾時疾辯菩薩卽起合掌白佛言世尊何因緣故如來微笑佛言善男子汝見寶髻施我頂寶不已見世尊善男子如是菩薩已於無量無邊佛所發阿耨多羅三藐三菩提心持戒精進求於菩提供養無量恒河沙等諸佛世尊亦已調伏恒河沙等無量衆生善男子如是菩薩於未來世過十阿僧祇劫當得阿耨多羅三藐三菩提號曰寶出世

界名淨光劫名無垢其佛世界七寶所成光明遍照十方世界一切人民無有飢渴一切皆是清淨菩薩耳初不聞二乘之名常聞純一大乘之法是故如來名曰寶出一切菩薩具足神通其土無主唯除法王一切衆生悉得化生亦復無有三惡之名及男女根愛欲之名無有衆生不具諸根亦無邊地衆生受命四萬中劫是佛世尊不說餘事唯除六度菩薩慈悲一切利根聞說一句悟解于句是佛常爲一切菩薩說陀羅尼金剛句云何名爲陀羅尼金剛句陀羅尼金剛句者卽是一句如是一句卽攝一切法句無盡

法句無盡法句一切諸佛所不能盡是故名爲無盡法句行無盡法句攝一切字一切字者攝一切法句一時不得說於二字一字亦復不合二字是故名一句名爲作句名爲字句若不分別字句法句作句是名陀羅尼金剛句善男子如是陀羅尼金剛句彼佛常爲諸菩薩說善男子若我一劫若減一劫說彼如來所有功德不能具盡爾時寶髻聞受記已心大歡喜說偈讚歎

一切知見一切事

得到一切法彼岸

遠離一切諸煩惱

是故名佛無上尊

我所供養無量佛 如來善了知一切  
如來獲得無上智 故知三世無障礙  
如來今爲我受記 令我遠離疑網心  
我亦當得真實道 如今釋迦牟尼尊  
一切大地皆令散 虛空日月可令落  
如來之言無有二 是故我定得菩提  
正語實語微妙語 授我無上菩提記  
若我真實得菩提 當善調伏無量衆  
我之所得淨妙國 及其大眾佛已記  
我今聞此無上法 壞疑趣向於菩提

我今精進修菩提

調伏衆生心不悔

今佛口說我信力

無上智慧及佛力

說是佛時萬二千衆生發阿耨多羅三藐三菩提心  
各作是言願我皆得生彼世界爾時世尊告阿難言  
汝當受持如是正法讀誦廣說爲大利益諸天人  
阿難若有衆生信受是經定當爲我之所授記善男  
子若以三千大千世界滿中七寶給施衆生滿一千  
年不如有人受持讀寫如是經典阿難白佛言世尊  
是經何名云何奉持阿難是經名曰方等大集大陀  
羅尼大善行菩薩入處爾時阿難聞佛說已諸天世

人皆大歡喜信受奉行

大方等大集經卷第二十七

音釋

卷第二十五

苦角切殼皮帶也

皺

綴也

酢

措酸

全

盆去聲塵瑜也

技

劓也

涸

竭水

踰

零也

第四紙

明字

南藏

明作

第八紙

海字

南藏

慧作

卷第二十六

提

梵語也此云忍

沮

阻止

揣

搏字

第二紙

十五行俱欲來此四字

南藏

作俱來至此

卷第二十七

卦廠

第四紙

相字

輒

然上聲

第六紙

入行不增不減四字

南藏

作不垢

第七紙

五行於字

南藏

作是

第十二紙

莊嚴四字三行具大

南藏

無具大

第十四紙

十八行震

南藏

振

第十八紙

十二行

南藏

侯世徵書

潘應鳳梓

大方等大集經卷第二十八

北涼天竺三藏曇無讖譯

日密分初護法品第一

爾時世尊故在欲色二界中間大寶坊中與大菩薩  
其數無量爲諸大衆說虛空日出息入息甘露門已  
默然而住一切大衆亦復如是各作是念如來今日  
深知我心欲法無厭必當降注甘露法雨作是念已  
合掌恭敬樂瞻如來猶如篤病樂見良醫處闇之者  
樂覩光明如沒水者樂至彼岸如受苦者樂得歸依  
一切大衆亦復如是是時衆中有一菩薩名蓮華光

功德大梵已於無量無邊佛所種諸功德善根增長  
於阿耨多羅三藐三菩提心不退轉成就具足法緣  
之慈從座而起合掌恭敬長跪白佛言世尊一切衆  
生心所緣處無有邊際駿速無形其性本淨於諸有  
中無能障礙欲得通達知真實故精勤修習四無量  
心因修習故獲得盡智世尊若使三界性本淨者何  
故修習如是盡智唯願如來爲諸菩薩敷揚散說令  
退轉者得不退故摧滅無量煩惱界故斷破無邊諸  
苦聚故唯願如來垂心憐愍說未曾聞衆生聞是未  
曾聞已度生死海摧折愛樹何以故一切煩惱愛爲

根本唯願垂哀分別演說愛之過答如來能淨衆生  
六根重願演說清淨法聚佛言善哉善哉善男子若  
有能行六波羅蜜卽能自知心所行處是人終不念  
聲聞乘雖復修行無量諸行未得其邊亦不怖畏退  
墮聲聞辟支佛地若諸菩薩不能修習四無量者如  
是菩薩於菩提道則爲有退是名不能清淨六根是  
名於法有貪有慳如是名爲行於他行不行自行是  
名不能成就七財不能度脫一切衆生於生死海是  
故我說如是行者卽是聲聞辟支佛行我初演說四  
聖諦行後復續說諸菩薩行爾時一切大衆咸作是

念如來將欲說聲聞乘不說大乘耶將非如來不樂如是菩薩衆耶如來不欲斷三寶種性耶何故不說大乘妙法爲諸天人得信心故未發菩提心者爲發心故已發心者得增長故爲諸衆生得信心故如來若說大乘法者無量衆生當得發起菩提之心因得修行不共之法成就具足法陀羅尼善男子聲聞乘者卽是大乘大乘者卽聲聞乘如是二乘無有差別爾時衆中諸在十住諸菩薩等作如是言世尊我等已得無生法忍我已能行如來十八不共法行我已解了諸聲聞乘及以大乘如是衆中無量衆生不能

得解小乘大乘諸善男子汝等當修不退禪定時諸菩薩卽便修入入已或有身放光明猶一燈炬如釋梵身光如日月光如三日光如四日光如八日光如千日光如億日光如是遍照娑婆世界是光能令無量衆生身心寂靜在三惡者離諸苦惱邪見之人遠離惡見永離貪欲瞋恚癡怖飢渴等患爾時此佛世界衆生皆共供養佛法僧寶增長善法爾時此佛世界并及十方恒河沙等無量世界若空不空及淨不淨光悉遍照十方佛界所有菩薩能行聖行菩提道者於一念頃悉來聚集大寶坊中頭面禮佛卻坐一

面爾時世尊告聲聞衆汝等比丘頗見如是善神足  
不如是神足能壞一切惡魔境界及諸有處能護法  
界能行一切諸佛境界分別聲聞辟支佛界出勝一  
切所有神通善男子一切菩薩所以示現大神通者  
爲增衆生諸善根故爲不斷絕三寶性故爲未信者  
得信心故爲已信者得增長故爲令衆生受安樂故  
爲欲長養大乘法故爲令身得常樂我淨故以如是  
等諸因緣故示諸衆生如是神通善男子隨如是等  
菩薩行處是中佛法卽得增長若現在未來久住不  
滅所有衆生修立塔廟供養衆僧求無盡身無苦惱

身所作供養皆作生身法身身供養者卽是塔像  
法身供養者書寫讀誦十二部經如是勝以七寶香  
華妓樂旛蓋瓔珞供養善男子我於爾時心亦受之  
由如是施如是衆生具足當得三乘果報心不退轉  
若諸衆生爲我造屋及經行處我卽受用若樹林華  
園講堂精舍及供養我所有弟子飲食臥具病藥房  
舍我亦受用若諸法師高坐說法我於是時亦至心  
聽若施法師衣食臥具病藥房舍園林服乘田宅奴  
婢我亦受之是名法供養如是之人能淨身心莊嚴  
身心亦能莊嚴阿耨多羅三藐三菩提能得無上微

妙快樂能一切物施一切人施一切時施能一切果  
受一切人受一切時受是名成就惠施之福是人終  
不到三惡道得不墮法如意所求不轉三乘是人常  
得具足二種所謂財法所求之物隨意卽得常爲十  
方諸佛所念能壞一切魔之境界若有信者以其所  
有奉施法師若有破戒受如是物乃至一葉一華一  
果如是癡人以是因緣得大不善果報現在卽得四  
大惡果一者惡名遠聞二者所親師友悉皆遠離三  
者得大重病苦惡而死所謂死時不下飲食覩見惡  
色以是因緣口不能語臥失糞穢四者所有六物及

餘財貨不至僧中或爲火燒惡賊所劫後世復受四  
種惡報所謂地獄餓鬼畜生若得人身身無手足若  
受餓鬼無量歲中不見水漿不聞其名受畜生身常  
食泥土若得爲人處在空土無三寶處五滓之世盲  
無眼目常遇重病食諸糞穢捨是身已還墮地獄何  
以故以受法師所得物故是惡比丘能壞能滅能斷  
三寶是故獲得如是惡果爾時衆中有一大德比丘  
名伽耶迦葉白佛言世尊如是人身可名人不我今  
思惟非是人也何以故是人深爲利養心故受持禁  
戒故名非人佛言善哉善哉迦葉寧受地獄等身終

不受取如是等物善男子人身難得已得佛法難遇已遇禁戒難受已受而不趣向聖行梵行是名喪失大利益事如是惡人貪食心故受持禁戒非爲法心如是癡人以多聞力及以國王大臣力欲受如是物卽便當得大惡業果爾時頻婆娑羅王白佛言世尊出家之人受如是物得如是果在家之人受其罪云何佛言大王汝今不應問如是事王言世尊我修聖行終不受取如是等物爲未來世諸惡王等問如是不事耳佛言大王我若宣說未來惡王所得果業有不信者得大果報是故我今置之不說王言世尊唯願

如來爲未來世利利婆羅門毗舍首陀有信敬者奉持佛法守護法師及財物者具分別說佛言善哉善哉大王若未來世諸惡王等侵奪法師如是等物當知是王現世獲得二十種惡一者天不衛護二者惡名遠聞三者親友遠離四者怨敵增長五者財物損耗六者心多散亂七者身不具足八者不得睡眠九者常患饑饉十者所服飲食變成惡毒十一者民不受敬十二者隣國數侵十三者所有眷屬不受其教十四者祕密之事謀臣顯露十五者所有財物水火侵奪十六者常有重病十七者湯藥不行十八者醫

藥不療十九者藥水不下二十者常念不淨是名二十捨是身已尋復當生阿鼻地獄一劫受苦過是劫已得餓鬼身處大空野不聞漿水飲食之名諸根殘缺身不具足無量歲中受大苦惱受是果已生大海中受大獸身無量由旬如大肉團常爲衆生之所啖食受大苦惱若得人身生無佛處五滓之世耳目不具大王未來惡王得如是等諸大惡報王言世尊我今寧受地獄之身終不受是惡王身也佛言大王今以是法法師財物付囑汝等有信諸王何以故夫法師者卽是如來法身之藏王言世尊若諸刹利婆羅

門毗舍首陀有能護持如是法財其人當得何等功德佛言大王如是人者勝於一切聲聞緣覺大王譬如有人能斷一切十方衆生所有壽命奪其眼目截其手足大王如是人者所得罪報爲多少耶頻婆娑羅王默然不荅佛言大王何故默然王言世尊是人所得惡業果報不可稱量不可計數世尊若於一人造此惡業罪尙難計況一切人大王若佛在世及滅度後若有惡王刹利婆羅門毗舍首陀侵奪法師如是等物所得罪報分爲百分上所得罪不及其一頻婆娑羅王言世尊如法治國是王難得若不放逸則

能護法若放逸者則不能護世尊能護法者得何功德大王譬如有人能與衆生如上壽命眼目手足是人得福寧爲多不世尊能與一人命眼目手足其福尙多況爾所人大王若有護法所得功德分爲百分先所得福不及其一王言世尊若有受取一法師物是得罪不若有擁護一法師者復得福不大王若有受取一法師物至五法師護一法師及五法師所得罪福正等無別大王若一廟寺若一村落若一樹林住五法師若鳴犍椎集四方僧客僧集已次第賦給房舍飲食臥具醫藥無愒惜心初夜後夜讀誦講論

歌患生死專樂涅槃不自讚身不訟彼短少欲知足常樂讚歎少欲知足勤心精進志樂寂靜修於念定憐愍衆生大王是名衆僧如法而住護戒精進持佛密藏讀誦書寫分別教詔是名衆僧憐愍衆生利益衆生能持如來十二部經亦能奉持寂靜禁戒具足慚愧賢聖功德大王是名衆僧大功德海爲天人師能大利益無量衆生能斷一切衆生苦惱能施一切衆生解脫是五比丘猶名衆僧何況無量大王若無量僧悉破禁戒但令五人清淨如法若有施者得福無量不可稱量不可計數何以故以有護持佛法者

故憐愍一切諸衆生故其心平等無二相故王言世尊破戒比丘可得處衆受信施不大王如王國內有一罪人未及擯驅王若給施刹利婆羅門毗舍首陀是人頗得受樂不耶不也世尊大王破戒比丘亦復如是雖在衆中受取信施不得安樂何以故破禁戒故不如法故大王如是人者一切十方無量諸佛所不護念雖名比丘不在僧數何以故入魔界故持禁戒者卽佛弟子毀禁戒者卽魔弟子又持戒者卽出世道破禁戒者卽入世道我都不聽毀戒之人受人信施如葶藶子何以故是人遠離如來法故王言世

尊言破戒者有何等相可得知不大王有智能知大王若有不能恭敬三寶不生信心無有慚愧於師和尙耆老長宿沙師同學不生恭敬摧滅聖幢不修梵行增長慳貪樂在居家不能清淨口四種業常修食心遠離法心樂說世間無益之事是名比丘初破戒相未名具足毀禁戒也若如是等受畜奴婢象馬牛羊駝驢雞猪乃至八種不淨之物是名具足毀禁戒也如是名爲沙門中滓沙門中曲沙門中幻沙門中賊沙門中醉沙門中旃陀羅也如是比丘不應共住不共和合不應共作九十九羯磨是名喪失比丘事

業墮在貪處大王寧與旃陀羅人而共同止不與如  
是惡比丘住何以故如是比丘燒滅善根斷三世善  
慈愍之心是惡比丘卽是圓廁增生死法卽是人天  
諸惡種子何以故是人欺誑是他人天如是比丘滅  
解脫燈能摧法幢能涸法海破說法者能誑施主破  
和合僧若有惡王若刹利婆羅門毗舍首陀擁護如  
是諸惡比丘是王便當增三惡道業種植天人諸惡  
種子大王若惡比丘呵罵責數如法住者敬信諸王  
應當擯驅若驅擯者王多得福若王無信如法比丘  
不應與彼惡比丘住如法比丘有智慧者應先往王

所作如是言大王今者能持法不王若答言大德我  
能如法護持佛法智者爾時便應默然若彼大王有  
貪心者語比丘言大德是寺廟中多有大眾我當云  
何爲五比丘驅遣多人智者聞已不應復往便當捨  
去至寂靜處王言世尊若有惡王隨順如是惡比丘  
語而是大地云何能載是王從此過於無量恒河沙  
劫終不能得復受人身無量衆生得解脫已是王猶  
故未能得斷三惡道業大王若未來世有信諸王若  
刹利婆羅門毗舍首陀能護法師造立塔像供養衆  
僧種種所須治惡比丘爲護法故能捨身命寧護如

法比丘一人不護無量諸惡比丘是王捨身生淨佛  
土常值三寶不久當得阿耨多羅三藐三菩提大王  
我今不聽一人受畜八不淨物唯聽大衆得受畜用  
大王若有人能護持法者當知是人乃是十方諸佛  
世尊大檀越也護持大法大王僧物難掌我今唯聽  
二人掌護一者羅漢比丘具八解脫二者須陀洹人  
大王除是二人更無有能掌護僧物也

日密分中陀羅尼品第二

爾時世尊爲頻婆娑羅王說是法已東方有國名曰  
無量彼中有佛名五功德常說妙法教化衆生有一

菩薩名曰日密至心聽法仰瞻虛空見有無量無邊  
菩薩從東方來趣向西方卽曰佛言世尊我見東方  
無量菩薩趣向西方以何因緣捨淨妙國趣向穢土  
善男子西方過此無量無邊恒河沙等諸佛世界彼  
有世界名曰娑婆五淨具足弊惡衆生充滿其土釋  
迦如來於中宣說三乘之法爲欲增長佛法故爲  
不斷絕三寶種故爲破魔界豎法幢故爲法久住不  
滅盡故彼佛世界有無量佛無量菩薩宣說寶髻陀  
羅尼法旣說法已釋迦如來讚說二乘四無礙智四  
種梵行及四攝法無量衆生聞是法時心無疲厭樂

甘露故以彼如來本願力故四方無量諸佛菩薩悉  
集其土佛說法時諸菩薩衆悉入禪定旣入定已身  
放光明如一燈炬至億日光善男子若欲護法可從  
定起詣娑婆世界善男子彼佛世界所有衆生煩惱  
堅牢繫縛深重其形醜穢多起憍慢惡口兩舌遠離  
實語其實愚癡現智慧相多起慳貪現捨離相多有  
諂曲現質直相心多濁亂現清淨相多有嫉妬現柔  
輒相樂離別人現和合相多起邪見現正見相彼國  
衆人隨女人語以隨語故斷絕善根增三惡道善男  
子汝今頗能爲我作使至彼國不我欲與欲令彼如

來善說法要所言欲者謂真陀羅尼是陀羅尼成就  
具足無量功德能斷欲貪色無色貪憍慢我慢一切  
取貪一切五蓋一切我見斷見戒取見取邪見常見  
衆生見士夫見作者見受者見人見天見色見聲見  
香見味見觸見四大見出生見滅見住見是名隨  
如順忍是陀羅尼能真實知色乃至識眼乃至意陰  
入界諸入解脫法界無上妙樂善男子彼界衆生如  
生孽生盲生瘧貪欲狂醉是故與欲隨如真實陀羅  
尼法一切法藏不可思議諸法之門能壞一切諸魔  
伴黨及魔境界善男子是陀羅尼亦能調伏一切魔

衆能怖一切諸惡毒龍能使惡鬼生知足想能化一切阿脩羅衆能調一切大金翅鳥怖緊那羅令諸利利婆羅門毗舍首陀生於敬信能壞一切貪女身者令多聞者生愛樂心習禪定人心得寂靜善療一切諸惡重病能除一切國土惡相所謂惡賊惡鳥惡獸惡風惡雨惡寒惡熱善男子若有人能誦如是陀羅尼者則能得見無量諸佛善男子汝持是呪至彼國土向彼四衆具足宣說爾時世尊卽說是陀羅尼  
婆移婆蛇波利婆吟一 婆醯婆訶波利婆吟二 卑利癡比卑利癡波利婆吟三 阿脾阿婆波利婆吟四 泐

泐泐闍波利婆吟五 摩吟摩羅波利婆吟六 哇岐卻伽波利婆吟七 阿路翅阿路迦波利婆吟八 哆咩哆摩波利婆吟九 思吟思羅波利婆吟十 伽咩伽摩波利婆吟十一 阿步婆阿步婆波利婆吟十二 羅摩三羅摩四羅摩五羅摩六羅摩七邏羅八邏羅九邏羅十摩比挫若那十一 復多其醯復多其力摩波利婆吟十二 遮颯其力醯遮颯其力摩波利婆吟十三 輪路多其力醯輪路多其力摩波利婆吟十四 其浪那其力醯其浪那其力摩波利婆吟十五 時呪其力醯時呪其浪摩波利婆吟十六 迦蛇其力醯迦蛇其力摩波

利婆吟<sup>七</sup>十摩那其力醯摩那其力摩波利婆吟<sup>七</sup>  
八揆施其力醯揆陀其力摩波利婆吟<sup>九</sup>十脾陀那  
其力醯脾陀那其力摩波利婆吟<sup>十三</sup>室囊其力醯室  
囊其力摩波利婆吟<sup>一</sup>十優波陀其力醯優波陀其  
力摩波利婆吟<sup>三十</sup>婆婆其力醯婆婆其力摩波利  
婆吟<sup>三十</sup>闍提其力醯闍提力摩波利婆吟<sup>四</sup>十闍  
邏摩那羅其力醯闍邏摩那羅其力摩波利婆吟<sup>十三</sup>  
五豆吐薩多波其力醯豆吐薩多波其力摩波利婆  
吟<sup>三十</sup>阿邏波邏髓闍其力醯阿邏波邏髓闍其力  
摩波利婆吟<sup>七</sup>十阿拔多<sup>八</sup>十比拔多<sup>寫九</sup>十阿婆

邏牟波摩薩寫比伽<sup>四</sup>十比尼跋多<sup>一</sup>十阿陀利也賴  
吟<sup>四十</sup>散比伽扇提<sup>四十</sup>莎呵  
爾時日密菩薩摩訶薩白佛言世尊我能向彼宣說  
是呪但於彼土生怖畏想何以故如來向者爲我宣  
說彼土衆生多諸弊惡猶如生聾生盲生瘰隨女人  
意世尊若有隨順女人意者當知是人永斷善根佛  
言善男子汝今不爲現利後利當爲饒益一切衆生  
但往宣說勿生疑慮善男子汝非彼土維摩詰耶何  
故生怖日密菩薩默然不對善男子何故默然日密  
言世尊彼維摩詰卽我身是也世尊我於彼土現白

衣像爲諸衆生宣說法要或時示現婆羅門像或刹  
利像或毗舍像或首陀像自在天像或帝釋像或梵  
天像或龍王像阿修羅王像迦樓羅王像緊那羅王  
像辟支佛像聲聞像長者像女人像童男像童女像  
畜生像餓鬼像地獄像爲調衆生故是時衆中有諸  
菩薩其數八萬同一三昧出入共俱復有無量無數  
菩薩其心掉動至心繫念欲得親近覲見禮拜釋迦  
如來及諸大衆并欲聽受微妙大與如是大衆皆共  
同心欲往彼界我爲是輩欲說大事何以故是等大  
衆其心未定若往彼界或生顛倒近惡知識爾時彼

佛告曰密言善男子汝今不應生怖畏想何以故我  
今當施汝等菩薩不共法行無想行調伏行解脫行  
分別生死行不斷三寶行大慈大悲行一切智解脫  
行破壞四魔惡邪論行盡智無生智行畢竟入涅槃  
行是名蓮華陀羅尼門是陀羅尼令諸菩薩不樂三  
界證無相解脫門入無行解脫門善男子若有信者  
能至心聽是蓮華持是人能薄一切貪欲一切煩惱  
捨身七世常得生天識知宿命雖處欲界不爲欲汙  
常樂出家一切人天樂與供養善男子若有人能至  
心七日及聽是持者終不墮墜三惡道中善男子若

有人天聽是持者遠離欲法修習禪定若有人能於  
王利利婆羅門毗舍首陀衆中宣說是陀羅尼聞者  
尋發出家之心若有女人能至心聽是陀羅尼受持  
讀誦卽轉女身得男子身於阿耨多羅三藐三菩提  
心無有退轉乃至證得大般涅槃終不更受女人之  
身除自發願善男子若有人能以是總持呪餘藥草  
持塗鼓貝若打若吹若有聞者邪見蠱道諸弊惡病  
無能加之善男子是陀羅尼成就如是無量福德爾  
時世尊卽說是陀羅尼句

思陀摩提一 比路迦摩提二 伊梨翅沃利徒三 流遮

修流遮

四佛提比佛提 五摩訶佛提 六溫摩提溫摩

多波羅提徒陀濇 七羅伽婆羅迦陀羅波利提徒陀

濇 八頻豆頻豆摩提 九至吒至吒波羅提徒陀濇 十

過翅戰陀豆 十一呵呵至置 十二呵多尼咩 十三呵多迦摩

比歧 十四呵多富那婆娑羅闍 十五呵多三暮沃 十六呵多

比摩多佛題 十七呵多蚩其攤 十八呵多比三摩其攤 十九

呵多三牟陀闍腓 二十呵多比摩多邏祇 二十一呵多希

醯 二十二呵多遮知 二十三呵多達波羅闍 二十四呵多婆

休羅闍 二十五呵多婆闍摩提 二十六呵多留伽摩提 二十七

呵多烏伽賴咩 二十八呵多陀摩密提 二十九呵多薩

娑優波陀那<sup>三</sup>若若<sup>三十一</sup>比闍若若<sup>三十一</sup>比婆闍  
若若<sup>三十一</sup>婆邏末力伽若若<sup>三十一</sup>伊沙安兜邏伽豆

唵<sup>三十一</sup>莎呵

爾時世尊告曰密菩薩言善男子是蓮華持能斷四  
流汝當至心受持是持向彼世界何以故彼佛世界  
有百億魔衆能壞衆生所有善法善男子汝等若誦  
是陀羅尼則不爲彼惡魔所侵爾時日密與無量億  
諸菩薩俱無數人天白佛言世尊如來智慧不可思  
議我等昔來初未曾聞是陀羅尼爾時彼佛世界女  
人八萬四千聞是持已尋轉女身得男子形時彼佛

以瞻婆華鬘告曰密言善男子汝持此髮并陀羅尼  
往娑婆世界供養彼佛釋迦牟尼爾時日密從彼如  
來默然而受是時會中八萬菩薩俱白佛言世尊我  
等亦欲往彼世界佛言善男子善哉善哉汝等若往  
一切當現梵天之像爾時大衆即便化爲梵天<sup>之</sup>身  
往娑婆界釋迦如來所到已卽於此娑婆界雨瞻婆  
華頭面禮敬釋迦如來右遶三匝卻坐一面時佛故  
爲頻婆娑羅王宣說法行爾時南方過一由旬滿城  
沙數諸佛世界有一世界名衆染幢其中衆生具足  
五滓其土有佛名山王如來應供正遍知明行足善

逝世間解無上士調御丈夫天人師佛世尊今現在  
爲諸衆生宣說法要彼佛世界有一菩薩名香象王  
仰瞻虛空見無量菩薩從南方來趣向北方見已白  
佛言世尊如是菩薩摩訶薩等何因緣故從南方來  
趣於北方佛言善男子北方過一由旬滿城沙數世  
界有國名娑婆釋迦如來在中宣說大集妙典分別  
三乘爲不斷絕三寶種故不斷法行破魔界故豎法  
幢故一切十方諸佛世尊悉於彼土宣說敷演寶幢  
陀羅尼說已各各還本住處釋迦牟尼爲諸菩薩及  
聲聞衆宣說法要善男子汝等頗欲詣彼世界聽受

法不我今亦欲與彼佛欲所謂斷業陀羅尼隨順空  
門斷於色貪僑慢慢我慢乃至爲得盡智無生智  
故爾時世尊卽說此陀羅尼句

豆幕提 一豆幕提 二奧又豆幕提 三波羅婆姿豆幕  
提 四薩婆阿迦舍豆摩 五阿鞞呬伽 六鞞咩多呬伽  
七阿鞞又呬伽 八阿婆幕阿卻伽 九阿那若卻伽 十  
脾也佛提卻伽 十一婆路遮卻伽 十二唵卻伽 十三提  
彌邏卻伽 十四烏數摩卻伽 十五烏羅卻伽 十六阿叉卻伽  
十七地婆摩那卻伽 十八溼波波卻伽 十九地婆比若那卻伽  
二十遮颯陀兜卻伽 二十一地婆摩那比若那陀兜卻伽 二十二

一 界利癡比陀兜卻伽二十 蛇婆比若那陀兜卻伽  
三十 折挫利蜜兜波那卻比伽四十 蛇婆阿脾陀尼  
迦卻伽五 豆咭卻伽六 蛇婆末力卻伽七 比  
婆婆那八 阿比又婆九 阿婆那那十 比那那十一  
一 婆牟陀那那十二 薩婆迦邏那那十三 薩婆散咳  
那比具波那那十四 阿冀之那那十五 又婆十六 又  
婆十七 伊利十八 蜜利十九 伊伊利二十 伊伊蘭彌利  
一 四十 莎呵

一切煩惱善男子汝當一心受持讀誦是陀羅尼往  
彼世界教化衆生香象王菩薩言世尊我已至心受  
誦是持今欲往彼然生畏想何以故我曾從佛聞彼  
世界衆生弊惡多貪瞋癡時山王佛告香象王言善  
男子汝常化作婆羅門像教化衆生或摩醯首羅像  
或帝釋像或那羅延像或鬼像天像龍像阿修羅像  
轉輪王像婆羅門利利毗舍首陀像大臣長者像聲  
聞像男女等像教化衆生云何方言於彼世界生怖  
畏耶善男子我當施汝大法行法一切智慧能知諸  
行破四魔行能調一切衆生行能喜一切衆生行不

斷三寶行能調一切惡龍行能壞一切衆生惡業行  
大慈大悲行破三惡道行救衆生行破惡見行能壞  
女業行一切法無盡行能破一切慳貪行能得一切  
三昧神通行能令衆生歡喜行乃至能得菩提道行  
善男子若有衆生聞是等行當知是人能得破壞恒  
河沙等惡業因緣斷絕三障唯除五逆謗方等經毀  
訾聖人善男子若有人能信心聽受如是等行是人  
隨意獲得三乘不離十方諸佛菩薩阿羅漢等常淨  
三業隨衆生意當知是人能一切捨乃至頭目一切  
諸要不能加害是人若行尸波羅蜜時得具忍戒聖

所樂戒聖所念戒大寂靜戒調伏梵釋四天王戒調  
伏婆羅門刹利毗舍首陀戒是人終不自讚己身毀  
訾他身心常呵責世中利養臥安悟安身無病苦易  
得飲食一切衆生之所樂見是人臨死則得覩見諸  
佛菩薩諸佛讚言善哉善哉善男子善持禁戒精進  
無懈當生我國我能令汝住十住位既見佛已心生  
歡喜以是因緣捨身卽得往生淨國位階十住乃至  
得阿耨多羅三藐三菩提是人若行毗梨耶波羅蜜  
時成就大力身心無病健行布施戒波羅蜜人天龍  
鬼阿修羅等悉來供養禮拜是人乃至得阿耨多羅

三藐三菩提若行羸提波羅蜜時得法緣忍不覺不見一切衆生是人若爲一切衆人之所割剝終不生於一念惡心乃至得阿耨多羅三藐三菩提常爲人天之所供養是人若行禪波羅蜜時獲得法緣禪定解脫十方諸佛無時不念乃至得阿耨多羅三藐三菩提常爲人天之所供養是人若行般若波羅蜜時常爲諸佛菩薩所護樂於寂靜調伏心界了了通達一切法界心無疑礙人天不能沮壞其心乃至得阿耨多羅三藐三菩提常爲人天之所供養善男子受是行已往娑婆世界不應生怖善男子若淨世界所

擯之人悉在彼土所謂五逆謗方等經毀訾聖人犯四重禁如是人等多共汗辱娑婆世界釋迦如來本願因緣於彼現身善男子若彼世界所有惡人聞是行已七年之中修慈悲心離口四過修習六念善男子是人復當淨自洗浴著鮮潔衣向於東方至心作禮誦如是等大行陀羅尼乃至七年所有諸惡皆悉除滅若有女人能如是行卽轉女身得男子身乃至得阿耨多羅三藐三菩提爾時世尊卽說此陀羅尼舍羅那脾地一式又脾地二蜜提脾地三波羅呵那脾地四律提脾地五因提利地脾地六婆羅脾地七

蒲澄伽脾地八三摩提脾地九陀羅尼脾地十又提  
 脾地十一長那脾地十二阿留波脾地十三阿尼闍脾地十四  
 末力伽脾地十五阿邨若脾地十六波羅提散比陀脾地十七  
 復彌脾地十八邨陀脾地十九摩訶咩羅脾地二十摩訶  
 伽留那脾地二十一界利癡比脾地二十二薩垂脾地二十三  
 陀摩脾地二十四多摩脾地二十五阿路迦脾地二十六  
 波羅提婆娑脾地二十七波羅提首六迦脾地二十八伽  
 伽那脾地二十九摩留多脾地三十若牠脾地三十一波  
 羅提多脾地三十二阿尼蜜多脾地三十三具沙脾地三十四  
 四 靳遮那脾地三十五阿比婆娑三十六阿菟那三十七阿

菟那三十八阿婆訶遮遮三十九遮遮羅比牟四十叉地比  
 牟四十一阿摩脾地比牟四十二阿三牟陀遮羅比牟四十三  
 三 車陀比牟四十四阿迦舍比牟四十五菟波舍摩比牟  
 六 四十 阿那婆娑比牟四十七阿訶訶比牟四十八阿羅波  
 邏比牟四十九郁波舍摩娑利羅比牟五十莎阿  
 爾時香象王菩薩白佛言世尊我當受持讀寫大行  
 陀羅尼已往娑婆世界是時彼土多有無量菩薩摩  
 訶薩俱從定起共白佛言世尊我亦欲往娑婆世界  
 覲見禮拜釋迦如來聽受諮啓大集經典佛言善哉  
 善哉善男子欲往隨意今正是時善男子汝等可化

作帝釋像時香象王菩薩摩訶薩及其大眾悉皆變  
身爲帝釋像俱共發來詣娑婆界到已卽於娑婆世  
界雨散諸香所謂牛頭栴檀香堅韌香多摩羅跋沉  
水諸香多伽羅香以用供養釋迦如來爾時香象王  
菩薩與其大眾從空而下頭面禮佛右遶三帛卻坐  
一面

大方等大集經卷第二十八

侯世徵書  
潘應鳳梓

大方等大集經卷第二十九

北凉天竺三藏曇無讖譯

日密分中陀羅尼品第二之餘

爾時西方過四十恒河沙等諸佛世界有佛世界名  
曰堅幢具足五滓其土有佛名高貴德王如來應供  
正遍知明行足善逝世間解無上士調御丈夫天人  
師佛世尊今現在宣說法要教化衆生彼大眾中有  
一菩薩名光密功德仰瞻虛空見諸菩薩從西方來  
趣於東方見已白佛言世尊何因緣故無量菩薩從  
西方來趣於東方佛言善男子東方去此四十恒河

沙等世界彼有世界名曰娑婆具足五滓釋迦如來  
以是因緣爲諸衆生宣說妙法名曰大集分別三乘  
爲不斷絕三寶性故破魔界故豎法幢故一切十方  
無量諸佛悉集彼國咸共宣說寶幢陀羅尼說已各  
各還本在處釋迦如來爲諸菩薩及聲聞衆敷揚宣  
說四無礙智清淨梵行善男子汝今頗欲請彼世界  
見彼佛不我今亦欲與彼佛欲所謂斷業陀羅尼隨  
無願定成就具足無量功德能斷欲貪色無色貪僞  
慢慢我慢乃至盡智無生智得阿耨多羅三藐三  
菩提爾時世尊卽說此陀羅尼句

舍那舍婆一摩舍那舍婆二阿婆又舍三又颯舍婆  
四遮颯舍婆五輪盧多舍婆六其浪那舍婆七視  
婆八迦蛇舍婆九摩那舍婆十又婆娑陀十一遮颯  
利癡比又婆十二輪盧多阿婆又婆十三其浪那沃祇又  
婆十四視颯婆由又婆十五迦蛇迦邏摩又婆十六摩那易  
闍又婆十七阿路迦若蛇又婆十八頻闍散迦羅摩又婆  
十九安仇邏卻伽又婆二十摩流波脾蛇又婆二十一舍  
摩迦闍又婆二十二又蛇邏安又婆二十三扇多脾娑邏  
又婆二十四那奴那二十五泥那奴那二十六阿婆泥那奴  
那二十七那蛇波那移那奴那二十八伊槃都頭吐寫莎

系

大集經卷第九

經

大集經卷第九

七

國九

阿  
爾時佛告光密功德言善男子汝持是持至彼世界  
先問訊起居然後說之時諸菩薩白佛言世尊我已  
受持是陀羅尼我雖欲往然生畏想何以故曾從佛  
聞彼土衆生惡見成就多貪恚癡隨女人語能速造  
作阿鼻獄業佛言善男子汝非彼土諸四天下二界  
中間二十一日大金翅鳥恐怖大海六萬四千億諸  
大龍王令得歸依佛法僧寶發菩提心耶世尊實如  
聖教善男子國土亢旱汝非象龍馬龍金翅鳥龍於  
七日中降注大雨令諸惡龍生恐怖耶世尊實如所

言善男子汝於如是諸惡龍中猶不生畏何緣而今  
生怖畏耶世尊譬如智人聞於他處多有寶藏是人  
卽往以抓把之把已漸見心生歡喜竟無疲厭我亦  
如是因問如來得聞如是實語因聞是語得大勢力  
能執佛印調伏彼土佛言善哉善哉善男子我當施  
汝大神良呪能淨諸業淨於因緣淨於調伏淨於欲  
淨增長淨平等淨惡風淨行淨無明淨生死淨一切  
煩惱淨一切三界有爲之法淨於彼此是名曰呪善  
男子如是神呪彼國聞已上中下結皆悉微薄色無  
色有亦復如是皆得超越恒河沙等劫中諸業一切

五有身口意惡皆能令淨善男子若有人能聽受是  
呪持諷誦讀乃至七日至心不忘當知是人一切惡  
罪皆悉消滅除五逆罪謗方等經毀訾聖人犯四重  
禁是人所求乃至菩提隨意卽得若欲修行檀波羅  
蜜亦得成就乃至般若波羅蜜亦復如是善男子娑  
婆世界所有衆生無有因緣得呵責法何以故十方  
世界所可擯遣諸惡衆生皆往生彼娑婆世界是故  
能作五逆惡罪謗方等經毀訾聖人犯四重禁是人  
以是業因緣故多生惡道受無量苦旣受苦已又不  
能得十善之法以是因緣復還生於娑婆世界是人

若本修習信根乃至慧根終不生於弊惡國土以修  
如是惡法因緣故生於惡國諸根殘缺不具人身無  
有念心飲食衣被臥具醫藥嚴身資生所須難得壽  
命促短不得安眠智慧善根福德不具吉事少無  
有慈心樂行惡業樂修惡見樂讀邪書樂信惡友樂  
發惡願多諸病苦多惡遠務常喜增長二惡道法敬  
事邪神受性弊惡調戲嫉妬具足成就諸不善業樂  
謗三寶樂行三惡道善男子是惡衆生聞是呪已於  
生死法而生悔心離三惡道修習信根乃至慧根亦  
樂修行六波羅蜜清淨梵行增壽益算除惡病苦智

慧熾盛親厚無損一切善法無有耗減具足成就十  
善之法長益三寶樂修法行令諸眾生具足如是無  
量善法善男子釋迦如來娑婆世界若有眾生受持  
禁戒敬信三寶諮啟妙法讀誦書寫得歡喜心以是  
因緣卽得過於三惡道業若有未來重惡之罪卽現  
在受若小遇頭痛若失財物眷屬離壞惡名遠聞若  
被打罵則得除滅善男子唯是神呪成就就具足無量  
功德能壞一切所有惡業能爲眾生作大利益能浣  
眾生無量惡心作大光明得大心念作大寂靜是人  
常爲十方諸佛菩薩聲聞緣覺諸天龍鬼人王之所

擁護是人臨死得見十方無量諸佛聞佛所說諸佛  
讚言善哉善哉善男子汝來生我淨妙國土我能令  
汝速住十地是人尋時生歡喜心歡喜心故則得深  
信以是因緣則得生於淨妙國土生已卽階十住正  
位得阿耨多羅三藐三菩提善男子汝可受持如是  
神呪讀誦通利向娑婆世界先往問訊釋迦如來然  
後宣說爾時世尊卽說此陀羅尼

卻伽波利車叱一竭婆叉斯二竭婆吟三鄰陀波邏  
婆伽差四又婆俞岐五波邏提呵吟六舍摩那思迦  
提比三摩呬伽受徒八呵又虵那沃九又婆婆祇十

尼陀那闍徒<sup>十三</sup>摩那闍徒<sup>二十</sup>阿陀舍地闍徒<sup>三十一</sup>比  
波邏婆闍徒<sup>四十一</sup>斯又闍徒<sup>五十一</sup>斯若闍婆闍徒<sup>六十一</sup>娑利  
羅仇呵闍徒<sup>七十一</sup>沙羅仇呵闍徒<sup>八十一</sup>厠婆那拘施<sup>九十一</sup>娑  
陀那拘薄<sup>十</sup>思婆陀那緹<sup>二十</sup>比婆波邏羅<sup>三十一</sup>沃<sup>四十</sup>  
優波迦羅摩那緹<sup>三十一</sup>阿那婆哆羅<sup>四十一</sup>波羅提  
迦邏<sup>五十一</sup>那<sup>五十一</sup>娑迦地施<sup>六十一</sup>娑盧遮那娑<sup>七十一</sup>迦邏  
地陀<sup>七十一</sup>迦摩娑施<sup>八十一</sup>阿舍卻岐<sup>九十一</sup>那地軍  
祇<sup>十</sup>邨陀婆灣<sup>三十一</sup>基離那婆灣<sup>三十一</sup>留遮婆灣<sup>三十一</sup>  
娑<sup>三十一</sup>摩迦<sup>三十一</sup>舍利地婆寧<sup>五十一</sup>摩伽闍徒<sup>三十一</sup>  
六 訶利拘那婆<sup>七十一</sup>那地那目<sup>三十一</sup>娑羅又拘羅

九<sup>三十一</sup> 那地那受<sup>四十一</sup>因陀羅婆娑灣<sup>四十一</sup>烏阿<sup>四十一</sup>  
阿婆阿<sup>三十一</sup>阿邏婆阿<sup>四十一</sup>婆邏阿婆邏<sup>四十一</sup>婆  
咩伽豆佉尼提羅涅槃<sup>六十一</sup>莎呵

爾時彼佛說此陀羅尼已時彼會中復有無量菩薩  
大眾同聲讚言善哉善哉我等今日亦欲往彼彼佛  
告言宜知是時汝若往者一切變身為那羅延像皆  
言如是世尊爾時光密菩薩與諸大眾一切化為那  
羅延像俱共發來至娑婆界既至此已於虛空中雨  
細金沙持以供養釋迦如來既供養已從空而下頭  
面敬禮右繞三匝卻住一面爾時北方過於八萬恒

河沙等諸佛世界彼有世界名普香身具足五淨是  
中有佛號德華密如來應供正遍知明行足善逝世  
間解無上士調御丈夫天人師佛世尊今現在爲諸  
衆生宣說法化彼大衆中有一菩薩名虛空密在會  
聽法仰瞻虛空見諸菩薩其數無量從北方來趣於  
南方卽曰佛言世尊何因緣故無量菩薩從北方來  
趣於南方佛言善男子南方過於八萬恒河沙等諸  
佛世界彼有世界名曰娑婆具足五淨有佛世尊名  
釋迦牟尼今現在世爲諸衆生宣說妙法分別三乘  
暨大法幢廣說法聚十方諸佛悉集彼國爲諸菩薩

解說寶幢陀羅尼已各各還歸本所任處釋迦如來  
故爲大衆菩薩聲聞宣說法要多有祕密甘露之語  
若欲聽者可往彼國釋迦如來常發大願若有十方  
諸菩薩等來聽我語卽得十八不共之法又復願言  
我成佛已願我土地具足上味彼佛世界所有菩薩  
有大念心精進持戒智慧具足猶如諸佛清淨世界  
修習禪定成就具足若入禪定其身放光或如一燈  
或如百千無量日月悉共集會聽佛說法若有十方  
諸菩薩等來至彼者皆從定起往至彼國覲見釋迦  
牟尼如來及其大會聽陀羅尼遊戲神通善男子汝

若欲往娑婆世界彼土眾生壽命短促多諸惡病智  
慧善根福德善行皆悉薄少於三惡道不生怖畏貪  
著財物心不清淨多懷嫉妬無有慚愧樂行十惡是  
諸眾生或有雜行捨是身已卽於其國作大惡鬼乃  
至作惡迦那富單那作惡鬼已收取地味乃至一切  
果菰穀米草木等味若有食者身得惡病無有勢力  
是諸惡鬼常伺眾生初生長大能斷其命是故其土  
衆生短壽善男子我本修習善提道時亦常發願願  
我來世常勤精進不休不息恭敬供養無量諸佛聽  
受正法問難深義我當云何護處胎者令其母子產

生安隱若天龍鬼若羅刹鬼若阿脩羅若迦樓羅若  
緊那羅若摩睺羅伽若拘辯荼若荔梨多若毗舍遮  
若富單那若迦多富單那若受多羅若阿衛末羅若  
一行乃至四行若起死尸鬼若毒蠱道若惡毒藥若  
觸身心如是等事不能爲是母子作惡乃至生已乳  
哺飲食長養大時不能作惡令其心濁乃至夢中亦  
復如是常行十善樂施樂戒於三惡道心生怖畏世  
尊有何呪藥能辦是事時無量佛卽時施我淨陀羅  
尼以是持力令我往於無量世中調伏無量無數衆  
生勸之令行六波羅蜜我於無量無數世中常念何

處有是妊身諸女人等防遮惡鬼乃至惡藥是故我  
往先敎三歸敎三歸已一切餓鬼及諸毒藥無能加  
害是見生已常得善心智慧具足身體無缺若遊行  
時常爲無量善神擁護面貌端正衆生樂見樂修慈  
悲布施持戒忍辱精進處在寂靜樂修禪定近善知  
識具足智慧壞諸苦惱一切天鬼樂爲供養狀離生  
死其樂涅槃若發無上菩提之心卽得阿耨多羅三  
藐三菩提若發辟支佛心卽得辟支佛道若發聲聞  
心卽得如實忍是諸衆生永離惡趣常行善道善男  
子我以如是無量方便調伏衆生爲阿耨多羅三藐

三菩提善男子若有衆生遇大重病取師子皮以呪  
呪之持與病者如其無皮若肉若骨若無肉骨若取  
糞塗及屎處土若無糞土以呪結索或作符書以與  
病者病卽除愈若樹無華果以呪雨水持以溉灌便  
得華果若亢旱時求覓龜心五返呪之置龍泉中則  
降大雨若多雨時壞敗穀麥城邑聚落求蟒蛇皮七  
返呪之置龍泉中霖雨卽止若其國土多有怪異惡  
風惡雨惡星日月應於七日中淨自洗浴服食乳糜  
七日之中讀誦是呪諸惡異怪尋卽消滅善男子若  
有人聞是陀羅尼所有煩惱尋卽薄少入正定聚善

男子我以如是無量方便調伏衆生令得修習六波羅蜜乃至得阿耨多羅三藐三菩提善男子是陀羅尼能爲衆生作大利益能斷一切諸惡重病能護一切姪身女人及處胎者滅一切結知陰入界摧伏四魔所有境界能令一切諸天歡喜令諸惡鬼生知足想能令惡龍心大怖畏能壞一切惡邪諸論令諸四姓心生歡喜能令女人貪心除息令多聞者念心堅牢坐禪之人心得善寂能壞一切國土惡相令三寶種無有斷絕能令法界增長無減能令佛法廣普流布能壞一切無明癡聚能得盡智及無生智爾時世

尊卽說此陀羅尼句

摩那又<sup>一</sup>阿婆又<sup>二</sup>伽羅婆又<sup>三</sup>闍羅又<sup>四</sup>摩摩那又<sup>五</sup>又婆又<sup>六</sup>摩陀又<sup>七</sup>那茶又<sup>八</sup>那茶羅休<sup>九</sup>比婆那吒<sup>十</sup>卻伽那吒<sup>十一</sup>阿吒那吒<sup>十二</sup>究那吒<sup>十三</sup>波利究婆那吒<sup>十四</sup>那茶那吒<sup>十五</sup>富利迦那吒<sup>十六</sup>優多羅那吒<sup>十七</sup>伽毗那吒<sup>十八</sup>君闍那吒<sup>十九</sup>阿目佉那吒<sup>二十</sup>遮凡婆羅那吒<sup>二十一</sup>卻鉗婆羅那吒<sup>二十二</sup>佛迦羅那吒<sup>二十三</sup>帝婆留陀邏那吒<sup>二十四</sup>三摩羅地那吒<sup>二十五</sup>尸利拘婆那吒<sup>二十六</sup>僑多吒<sup>二十七</sup>多茶羅婆<sup>二十八</sup>摩留多卻婆<sup>二十九</sup>提休又<sup>三十</sup>婆提邏酬<sup>三十一</sup>挫摩那酬<sup>三十二</sup>

婆呵那富置三十 散提邏闍婆四十 阿摩摩闍婆三  
五 摩休羅伽闍羅三十 阿涅那七 阿涅那邏婆三  
八 阿涅那又九十 阿婆呵未力伽涅那又十四 伊槃都  
豆吐寫一四十 莎呵  
畢竟盡苦是名爲呪說是呪時彼大眾中六萬億人  
得如法忍復有六萬人入正定聚善男子我今以是  
淨陀羅尼與彼佛欲汝當受持諷讀誦寫時虛空密  
菩薩摩訶薩敬承佛敎受持讀寫是陀羅尼與無量  
菩薩俱共發來至娑婆界悉自變身爲轉輪王以種  
種寶供養如來頭面敬禮右繞三匝卻坐一面

日密分中分別說欲品第三

爾時頻婆娑羅王見無量菩薩或作梵像及帝釋像  
那羅延像轉輪王像從座而起敬意合掌在一面立  
爾時日密菩薩摩訶薩卽於佛前以偈讚歎

於諸足中最殊勝 施諸惡見大光明  
行正道者施法印 摧滅惡龍及四魔  
堅豎法幢施解脫 以大法炬壞衆闇  
親近善友修習定 愍衆生故說福田  
佛法僧寶甚難得 人身信心亦復難  
雖得人身善友難 得善友者壞煩惱

衆生闍行沒結河

如來船師能拔濟

四方諸佛遣我來

今於大會說與欲

日密菩薩說是偈已如其本土所教戒事悉皆說之  
爾時世尊告舍利弗是陀羅尼四方諸佛所與欲也  
爲欲利益此土衆生舍利弗汝當受持讀誦書寫是  
陀羅尼於四衆中廣分別說時虛空日密菩薩摩訶  
薩復以偈讚於佛

如來真實知法界

示魔衆生正直道

若有真實生信心

是則能破三惡道

供養如來一香華

無量世受無上樂

無量世中身具足

亦得無上真智慧

若能一聞是總持

卽得摧滅諸煩惱

一切人天所供養

獲得無生及盡智

日密分中分別品第四

爾時世尊告四大菩薩善男子汝若樂住此世界者  
隨意修習所有善法時四菩薩及其大衆卽便各各  
隨意入定旣入定已身出光明猶如一燈乃至猶如  
無量日月爾時大德阿若憍陳如承佛神力卽作是  
念我今若問如來一義如來因是或當分別廣說如  
是四陀羅尼如來說時其聲必聞娑婆世界衆生聞

已疑網心壞於向法中得大光明度於彼岸到正定  
聚不墮惡道一切悉行純善之法作是念已卽從坐  
起敬意默然合掌而立爾時佛告阿若憍陳如汝將  
不欲聞大義耶如是世尊實欲諮啟唯願聽許佛言  
憍陳如汝今知時我當破壞一切疑網憍陳如言如  
佛經中說有二種所謂愛與士夫行於生死云何名  
愛云何士夫何故如來說是一二種行於生死佛言善  
哉善哉憍陳如快發斯問能大利益無量衆生是知  
時問是如荅問諦聽諦聽吾當爲汝分別解說憍陳  
如愛有三種所謂欲愛色無色愛復有三種所謂有

愛斷愛法愛憍陳如云何欲愛所言欲者名爲放逸  
放逸因緣則爲貪觸以觸因緣則生樂想想樂想因緣  
則熾身心熾身心故樂行十惡十惡因緣則能增長  
三惡道苦若受人身貧窮困苦貪因緣故五道受生  
生在羊中多受苦惱雖受是苦心無慚愧不生悔恨  
若因少善還得人身愛心增長愛增長故身口不淨  
造作無量諸重惡業乃至五逆以是因緣復於地獄  
受大苦惱一切受苦皆因愛心是故如來爲愛解脫  
宣說正法呵責欲法若有衆生得聞如是呵責欲已  
觀欲如焰如大毒樹毒盆行廁如刀如賊如旃陀羅

經  
法華經卷二十九

經

法華經卷二十九

七

國九

如熱鐵丸如惡雷雨如惡暴風毒蛇怨家空野羅刹  
如殺害人如糞如塚若有人能作如是觀是人所有  
愛之與貪愛膩愛著愛宅愛熱愛增等法尋卽除滅  
滅已念法樂法學法受法取法勤求於法財法藏法  
淨法行法歸依於法是人臨死獲得法念因法念故  
尋得聞於十方諸佛宣說法要教化衆生旣聞法已  
心生歡喜生歡喜故卽得覩見諸佛色身是人捨身  
生淨國土無二惡道常與善人遊止共俱具足智慧  
捨施精進修習慈悲調伏衆生斷煩惱習具足無量  
莊嚴功德譬如香篋以盛衣服衣服皆香篋香不減

僑陳如若諸衆生善願力故生淨國土共善衆生同  
共事業亦復如是自增諸善彼善無減僑陳如是故  
善男子善女人若欲自利利他共利常當勤求依於  
善友僑陳如若人能作如是觀察欲性之相當知是  
人不久當得阿耨多羅三藐三菩提世尊云何善友  
僑陳如夫善友者所謂諸佛菩薩諸阿羅漢又善友  
者卽我身是何以故我常憐愍一切衆生能說諸欲  
所有過患是故大衆應受我語我所出語終無有二  
言不虛妄不兩舌語非無義語非麤惡語所言誠實  
慈語悲語安衆生語我今宣說諸欲罪過汝等應當

一心受持既受持已脫三惡道疾得阿耨多羅三藐  
三菩提爾時娑婆世界一切衆生同發聲言世尊唯  
願宣說欲之罪過我等今當至心受持佛言諸善男  
子有四種欲一者色欲二者形欲三者天欲四者欲  
欲是名爲四云何色欲四大造色凡夫不見無我衆  
生生顛倒想見男女想上下色想見色可愛是色可  
惡因是顛倒見男女相故令貪欲未生便生生已增  
長是人因是遠離善根及善知識不能善護身口意  
業是故名爲惡法之聚何以故不能觀察欲解脫故  
以是義故增二惡道受於地獄餓鬼畜生身無量世

中受大苦惱皆由貪欲貪欲因緣令欲增長若有智  
者觀察女色見不淨相皮膚肌肉筋骨血脉見已心  
樂修習是想如女身男身亦爾如近遠亦如是如  
此彼亦如是如他自亦如是是人若能修習是心卽  
於貪愛疾得解脫觀是身骨筋節相連心隨身行爾  
時繫心在於額上如橐許處心樂修習如是相已身  
得寂靜不見惡相不見惡事不見惡緣是則名爲奢  
摩他名心寂靜云何復名身寂靜耶是人入定滅於  
入息旣無入息何有出息是則名爲身心寂靜身心  
寂靜卽舍摩他之因緣也是人觀身所有骨節離散

如沙爲風所吹見已卽生空無物想觀於虛空是則名爲身心寂靜是名因於舍摩他定而得解脫世尊虛空相者是有爲相不僑陳如是有爲相世尊虛空若是有爲相者爲是自相是他相耶僑陳如若能觀察一切法界及有爲界是名爲自相何以故若能觀察色寂靜者卽見佛身所以者何若人觀骨能令如沙爲風所吹是人能破色貪色欲能深觀察色之實性是人所見皆如虛空十方諸色空如瑠璃於中復見無量諸佛乃至十方亦復如是復見如來三十二相八十種好十方世界亦復如是是人若得悔生死

法卽自思惟我當問佛如是虛空誰之所作當云何滅作是念我已問我已知已虛空之性無有作者當云何滅言虛空者無有覺觀無物無數無有相貌無出無滅一切諸法亦復如是作是觀時得阿那舍果是阿那含悉斷一切貪欲之心唯有五事未能除斷一者色愛二者無色愛三掉四慢五者無明是人若得見如來身便作是念我當知數是人爾時觀少見少觀多見多復作是念如是諸佛從何處來復作是念如是諸佛無所從來去無所至我三界心是心因身我隨覺觀欲多見多欲少見少諸佛如來卽

是我心何以故隨心見故心卽我身我卽虛空我因  
覺觀見無量佛我以覺心見佛知佛心不見心心不  
知心我觀法界性無堅牢一切諸法皆從覺觀因緣  
而生是故一切所有性相卽是虛空虛空之性亦復  
是空若有初發菩提心者當觀無量諸法因緣是人  
若發求聲聞心爾時卽得無相三昧令彼無明永滅  
寂靜亦復獲得隨順空忍是人若見虛空是空爾時  
卽得身心寂靜是則名爲空解脫門取阿羅漢則爲  
不難若復修行滅定解脫爲滅無量諸法因緣說是  
法時九萬九千億衆生得修定忍八萬四千衆生得

修空忍六萬衆生得空三昧解脫門二萬衆生悉得  
現見諸佛三昧八萬四千衆生得阿羅漢果無量衆  
生得須陀洹果復次憍陳如若有比丘自觀已身作  
不淨想不能調伏自己心者是人次應諦觀死尸若  
青色若爛壞若赤色若臃脹若離散若骨白如貝當  
深觀心樂任何處知已卽取如觀外色自身亦爾若  
青色乃至如貝如晝夜亦如是如夜晝亦如是如去  
來亦如是如來去亦如是爾時若見外物樹木人畜  
雜物皆作骨想作是觀已乃至命終不生貪心是人  
現在能離於欲他世未能是人若能獲得修空陀羅

尼者卽能觀骨作離散相如沙微塵若自若他不見  
色相如一微塵卽時獲得虛空之相見一切色如青  
瑠璃見已復觀虛空黃色能觀黃色赤色白色雜色  
瑠璃色若見地水亦如瑠璃是人能觀一切大地如  
四指許若欲動者卽以足指躡之令動隨意久近乃  
至大地樹木山河悉爲之動若觀諸水作種種色或  
分陀利華優鉢羅華拘物頭華波頭摩華於一切水  
行任坐臥觀一切山作種種色其形細軟如兜羅綿  
而於其中行任坐臥又自觀身輕漂如風作是觀已  
能遊虛空行任坐臥是人復入火光三昧身放種種

妙色光明又復遊入炎摩迦定身上出水身下出火  
作如是等大神變已復作是念我當云何得見諸佛  
爾時隨其所觀方面悉得見佛多觀多見少觀少見  
見已復念諸佛世尊無所從來去無所至我三界心  
是心因身我隨覺觀欲多見多欲少見少諸佛如來  
卽是我心何以故隨心見故心卽我身我卽虛空我  
因覺觀見無量佛我以覺心見似知佛心不見心心  
不知心我觀法界性無堅牢一切諸法皆從覺觀因  
緣而生是故法性卽是虛空虛空之性亦復是空我  
因是心見青黃赤白雜色虛空作神變已所見如風

無有真實是則名爲共凡夫人如實陀羅尼是人復作是念若有虛空卽是無取無有覺觀不可宣說如我心離觀虛空相亦觀心相不作遠離一切作不作發心設發尋滅以心緣滅故是心便滅淨身口意修習滅定是人長夜繫心在定從滅定起捨其壽命入於涅槃是名不共凡夫如實陀羅尼云何名爲共凡夫人如實陀羅尼若有能作如是思惟我隨意觀色卽是見色卽是我心我心卽色如我遠離一切色相觀虛空相是人爾時修虛空相是則名爲共凡夫人如實陀羅尼若有能作如是觀色卽是虛空我以

如是色因緣故得觀虛空虛空之性名無障礙是風住處如是風者因四大生我是色相亦復如是因四大起虛空風色等無差別一切法性性自空寂觀自他性亦復如是是虛空者卽是無生無滅作是觀時繫念如來作是念已見虛空中有無量佛卽時獲得阿那含果是名不共凡夫如實陀羅尼也復作是念言虛空者卽是我也卽是淨我卽是我心我者無色如空無邊我亦如是是名共凡夫如實陀羅尼若有能觀一切法中無我無我所言空處者卽是無我色無有我若念如來若觀如來卽是我也我見佛已得

沙門果乃至阿羅漢果是名不共凡夫如實陀羅尼也若觀淨我者卽是空處空卽我心若能永斷一切煩惱卽是淨心若能修習八直正道是名淨心能如是修卽能獲得須陀洹果乃至陀羅漢果是名不共凡夫如實陀羅尼復有觀色觀色相者卽分別相分別相者卽是瞋相瞋相者卽生死相我今爲斷生死相故觀心相空是名共凡夫如實陀羅尼又復觀我卽是寂靜我今亦未斷於覺觀若我觀我我如虛空我我者卽是苦苦所從生卽名爲集如是苦集是可斷法是名爲滅觀苦集滅是名爲道得須陀洹果

乃至阿羅漢是名不共凡夫如實陀羅尼又復念言我何以故觀於虛空虛空者卽我我若遠離虛空觀者次觀識處如虛空觀識觀亦爾如空無邊心亦如是是名共凡夫如實陀羅尼若能觀識卽是苦者知苦所從名之爲集苦集可斷是名爲滅觀苦集滅是名爲道得須陀洹果乃至阿羅漢果是名不共凡夫如實陀羅尼若觀識處卽是覺觀瘡疣煩惱如我遠離空處識處修無想處是人修無想已得無想定是名共凡夫人如實陀羅尼若觀識處卽是瘡疣苦惱之法如我遠離觀於識相次觀無想相言無想者卽

是無我無我所相作是觀已卽得須陀洹果乃至阿羅漢果是名不共凡夫如實陀羅尼若有能觀無想處者卽是細想如我遠離是無想處觀非有想非無想處是名共凡夫人如實陀羅尼若觀非想非非想處卽是大苦是處可斷可得解脫作是觀時得須陀洹果乃至阿羅漢果永斷一切欲貪色貪離凡夫名得聖人號永斷一切三惡道因是名如實陀羅尼也是彼諸佛之所遺來日密菩薩所齋持欲能斷一切諸結煩惱一切惡見我見取見戒見常見斷見命見作見士夫見受見色見觸見出見四大見能斷如是

等見是陀羅尼善能了達陰入界等能淨諸見能令受者永受安樂沮壞衆魔調伏惡龍令諸天喜壞阿脩羅調迦樓羅能喜利利娑羅門毗舍首陀能斷惡欲令坐禪者貪樂寂靜能療一切諸惡重病能防一切諸惡鬪訟能增法界能護三寶能得盡智及無生智壞無明聚如來說是陀羅尼時無量衆生得須陀洹果無量衆生得阿羅漢果無量衆生獲得是持無量衆生發阿耨多羅三藐三菩提心無量衆生得無生忍爾時阿若憍陳如白佛言世尊云何名爲蓮華陀羅尼如日密菩薩之所宣說智者受持讀誦書寫

得大利益不樂三界得無相解脫門者皆能斷諸煩惱七返常受人天之神雖在欲界不爲欲汙諸天人常所恭敬佛言憍陳如所問蓮華陀羅尼者非諸聲聞緣覺所知是陀羅尼乃至十八不共法行憍陳如假使我於無量劫中宣說是持終不可盡亦令聞者生迷悶心是陀羅尼唯佛能說唯佛能聽何以故是陀羅尼難知難解餘三亦爾世尊唯願如來當說如空行陀羅尼憍陳如至心諦聽當爲汝說憍陳如若有衆生放逸因緣生觸欲心是人不知解脫之處流轉生死無量世中在三惡道受大苦惱菩薩摩訶薩見諸衆生受如是等無量苦惱生憐愍心勤行不息遍修諸道作是行已得阿耨多羅三藐三菩提已說苦解脫衆生聞已卽得脫苦苦解脫者卽是初果乃至阿羅漢果憍陳如云何觸欲言觸欲者二身共合因身合故則生於觸因觸生樂因樂生苦苦因緣故生死苦惱從是而生憍陳如如四毒蛇以四因緣能害衆生見噓齧觸欲亦如有見因緣有聞因緣有念因緣有觸因緣因是四緣令諸衆生遠離一切諸善根本於生死中受大苦惱憍陳如云何名爲觸欲解脫若有比丘能觀白骨作是思惟色者卽是

誦薩見諸衆生受如是等無量苦惱生憐愍心勤行不息遍修諸道作是行已得阿耨多羅三藐三菩提已說苦解脫衆生聞已卽得脫苦苦解脫者卽是初果乃至阿羅漢果憍陳如云何觸欲言觸欲者二身共合因身合故則生於觸因觸生樂因樂生苦苦因緣故生死苦惱從是而生憍陳如如四毒蛇以四因緣能害衆生見噓齧觸欲亦如有見因緣有聞因緣有念因緣有觸因緣因是四緣令諸衆生遠離一切諸善根本於生死中受大苦惱憍陳如云何名爲觸欲解脫若有比丘能觀白骨作是思惟色者卽是

四大所造四大所造卽是無常性無堅牢離散之法  
皮毛肉血智者云何於是身中生淨好相作是觀已  
悉於一切十方淨色卽時獲得不可樂相是比丘復  
作是念我於是相樂修習者則斷除一切煩惱生老  
病死是名舍摩他若觀足骨乃至頭骨是名毗婆舍  
那旣得如是毗婆舍那舍摩他已觀息出入見息出  
時卽作是念如是風者從何處來去至何處如是觀  
時遠離身相生於空相不見內法是名內空不見我  
所及外色相是名外空觀內外空已復作是念我今  
修習入息相已作大利益能壞一切內外諸色我壞

如是內外色相皆是入息觀因緣也以是因緣令我  
不見內外諸色我無色相卽是空力我今定知一切  
諸法無有去處無有來處作是觀已所有覺觀一切  
永斷復觀是識知是一切覺觀因緣我當遠離心意  
識行何以故若有生者當知定滅作是觀時得須陀  
洹果乃至阿羅漢果或有獲得如法忍者或得菩提  
若觀覺觀是滅相者卽得滅定是名不共凡夫如空  
陀羅尼是持成就無量功德永斷無量諸大苦惱說  
是法時九萬二千衆生得須陀洹果六萬衆生得阿  
羅漢果九萬九千衆生得如空陀羅尼八萬衆生得

辟支佛果八千億衆生發阿耨多羅三藐三菩提心  
無量衆生得不退心爾時阿若憍陳如白佛言世尊  
高貴德王佛所施來欲隨無願陀羅尼唯願如來分  
別解說憍陳如我今當說至心諦聽憍陳如有諸衆  
生觸欲繫縛不知解脫是人應觀無願解脫作如是  
念欲欲色欲及無色欲觸欲解欲如是諸欲因覺觀  
生諸行因緣如是諸行無有作者無有受者因風而  
生我身口行亦復如是因風而生因是風故身得增  
長因是風故口得增長如我觀風卽入出息諦觀一  
切身諸毛孔從風因緣復觀一切不淨之物復觀是

身命終之時是尸更無風息入出復作是念我身口  
行因緣於風若無風者無身口行因緣是故爾時得  
空三昧修習增長因修習故能斷欲貪乃至觸欲作  
是觀已得須陀洹果乃至阿羅漢果或有發阿耨多  
羅三藐三菩提心爾時善意覺觀菩薩摩訶薩白佛  
言世尊若聲聞人修不淨相成得相已有何等相善  
男子若爲破壞欲貪之結修不淨相繫心眉間自觀  
身骨是名一相若觀自身及以他身是名二相又觀  
一切悉是不淨是名三相是人能觀苦集淨名舍  
摩他得暖法相是人如是觀白骨時見智如燈觀身

四行乃至微塵是名頂法觀四真諦是名聲聞不淨  
觀成就獲得舍摩他定是名白骨觀相觀是相時得  
入正道因入正道得須陀洹果乃至阿羅漢果善男  
子光明佛土聲聞之人觀如是法即得道果說是法  
尚無量衆生得如法忍無量衆生得如實忍

大方等大集經卷第二十九

侯世徵書  
潘以欽梓

大方等大集經卷第三十

北涼天竺三藏曇無讖譯

日密分中分別品第四之餘

爾時世尊復告憍陳如若四真諦可一念證者如來  
應爲一切衆生演說一行一法一事若一人證時一  
切衆生亦應同證何以故煩惱同故亦不應有八萬  
法聚差別之異憍陳如是故衆生應以種種因緣調  
伏不以一緣憍陳如一切衆生非實一乘一行一貪  
一念一欲一解一信是故如來宣說種種句偈名字  
種種法門以是義故如來具足十種神力憍陳如一

一切衆生具有種種顛倒之相是故如來爲破淨倒說  
無常相苦相無我相脹相爛相青相壞相離散等相  
世尊云何名爲一切世間不可樂想云何復名食不  
淨想佛言僑陳如汝今不應問如是事何以故彼界  
得道此界得道其相各異僑陳如我若具說衆生聞  
者或生迷悶世尊唯願憐愍爲諸菩薩能信解者分  
別宣說世尊是諸衆生若聞宣說如是二相能種善  
子增長善根能破無明世尊一切衆生癡愛因緣樂  
於生死是故生死無始無終世尊一切衆生以食因  
緣增長貪欲世尊一切衆生初未得聞如是二相是

故流轉生死五道受大苦惱如來世尊大慈大悲無  
量世中常念衆生唯願如來憐愍故說不可樂想食  
不淨想若佛宣說不可樂想食不淨想衆生聞者不  
生欲貪不生食貪世尊若有衆生能苦呵責欲心食  
心當知是人速到彼岸佛言僑陳如至心諦聽我今  
當說一切世間不可樂想食不淨想僑陳如世有二  
種一衆生世二者器世衆生世者所謂五道衆生器  
世者欲界之中有二十處色界十六無色四處云何  
欲界有二十處八大地獄一一地獄有十六圍繞一  
者活二者黑繩三者衆合四者叫喚五者大喚六者

熱七者大熱八者阿鼻地獄若有眾生身口意惡悉  
生如是大地獄中受大苦惱是諸眾生雖見妙色不  
生樂想以是因緣復生大苦聲香味觸亦復如是有  
智之人觀是事已不生樂想憍陳如若觀畜生其身  
細小猶如微塵十分之一有如微塵乃至如棗有一  
由旬乃至百千萬由旬等是諸眾生或有壽命如一  
念頃至七念頃或有一劫至千萬劫頃是諸眾生無  
有法行智慧慚愧憐愍之心當受苦惱生大怖畏各  
各常生相害之心遠離一切諸善之法常行黑闇常  
行邪道是故智者修不可樂想憍陳如智者復觀餓

鬼之身或長一尺或如人等或百由旬或如雪山常  
患饑渴裸形無衣被髮纏身無有慚愧羸瘦骨立身  
無血肉各生惡心心無憐愍濕冷諸氣永無復有或  
食鐵漿鐵麩鐵丸熱糞熱膿熱血熱風熱草熱菓然  
不能得恒不供足壽千萬劫常受苦惱行於黑闇智  
者觀已修習世間不可樂想憍陳如有智之人次觀  
人身一切皆有生苦苦老苦苦病苦苦死苦苦愛別離苦怨憎  
會苦求不得苦饑渴困苦欲苦瞋苦嫉妒等苦兩舌  
惡口寒熱等苦諸惡獸苦惡王等苦是人身中受如  
是苦智者云何而不修習不可樂想憍陳如智者云

何觀於欲天不可樂想智者觀初欲界六處是中衆生欲愛所焦所受果報不等故苦無常故苦取苦盡苦愛別離苦智者云何於中不修不可樂想次觀色界十六住處是中諸天修世禪定有漏故苦無寂靜苦所欲故苦有勝定苦善法藏苦未解脫苦不知彼岸不盡地獄餓鬼畜生人因緣苦觀是苦已智者卽修不可樂想復次色界衆生或有修習無漏禪定是等不能具足入正道苦欲具入正道方便時苦得無學地不自在苦不得緣覺三昧故苦不得如來三昧故苦不得如來三昧亦苦不能觀察一切衆生境界

故苦如是衆生於色界中若入涅槃受如是苦智者云何於色界中不修世間不可樂想次復觀察於無色界不可樂想彼中衆生修有漏三昧苦學地不得自在苦又不得聽聞正法故苦不能畢竟斷愛故苦捨命退時生邪見苦不能永斷三惡道苦捨命墮苦知如是時修習世間不可樂想復次憍陳如世間者卽是行行有三種身行口行意行身行者謂入出息口行者所謂覺觀意行者所謂想受是三種行其相是一智者云何能分別知智者觀息出入數時深觀息之冷暖乃至一切毛孔入出是人觀息諦知是息

本無今有若本無今有是無常相無決定相如電畫  
水如是觀時得身行相觀如是相從何因緣卽知是  
相因於覺觀覺觀之性本無今有是故無常是可斷  
法是可解脫是覺觀相因心而生心亦本無今有本  
無今有是無常相可破壞相無歸依相無有物相無  
有我相作是觀時於諸行中心則生悔能修世間不  
可樂想汝等比丘若能深觀如是三世則能永斷一  
切煩惱能淨正見斷生死法成平直道正聚所攝得  
須陀洹果乃至阿羅漢果憍陳如智者於諸行中修  
不可樂想憍陳如云何比丘觀所著衣作不樂想若

有比丘縫衣見衣觸衣著衣脫衣觀如是時如血塗  
皮爛臭可惡虫所住處無可樂處如是觀時於衣食  
心卽時除滅憍陳如云何修習食不樂想若有比丘  
執持鉢時如血塗鬻爛臭可惡虫所住處若得食  
時應觀是食如死尸虫若見麩時如末骨想得飯漿  
時作糞汁想得諸餅時作人皮想所執錫杖作人骨  
想得乳酪時作膿血汗想若得菜茹作髮毛想得種  
種漿作生血想憍陳如若有比丘作如是觀是名於  
食不可樂想憍陳如云何於房舍生不可樂想比丘  
若入房舍之時應生是念如入地獄受諸苦惱如是

房舍卽是和合所有材木卽是人骨土是人肉乃至一切牀榻被褥亦復如是作是觀時是名世間不可樂想若能觀察如是想者是人卽得如實法忍隨空無相無願等忍是人樂修空相因修空相見一切法悉是生滅苦空無我觀陰入界十二因緣一切法性苦空無我如是見已卽得須陀洹果乃至阿羅漢果橋陳如修習世間不可樂想能斷欲貪色無色貪一切橋慢疑掉無明乃至得無學地是名具足隨無願陀羅尼橋陳如是陀羅尼能破一切惡魔乃至能令三寶增長說是法時無量衆生得法眼淨無量億衆

諸漏永盡八那由他衆隨無願陀羅尼無量衆生發阿耨多羅三藐三菩提心五萬八千衆生得不退菩提心無量衆生得如法忍爾時無量衆生白佛言世尊一切衆生若聞是法云何不發阿耨多羅三藐三菩提心我今護持聽受是法佛言善哉善哉諸大檀越汝等今者欲護大法因護法故未來之世當得無量福德果報爾時舍利弗白佛言世尊德華密佛遣虛空密菩薩摩訶薩所持來欲淨陀羅尼唯願說之佛告舍利弗諦聽諦聽善思念之當爲汝說德華密佛所遣來欲淨陀羅尼爲壞此土衆生四倒舍利弗

此土衆生實無有我顛倒心故橫生我想智者深觀知無有我作是觀已則破顛倒舍爲弗云何智者觀於無我所謂觀身諦知無我何以故以和合故復次觀眼亦無有我何以故四大合故若眼轉瞬卽是風力如是風者因於虛空去來廻轉而虛空性性無所有亦不可說若無所有不可說者卽是無我是故虛空實無有我是空中風亦復無物不可宣說是故無我如觀風地亦如是地亦無物不可宣說是故無我水火亦爾是故當知眼之四大亦復無物不可宣說是故無我若復有言眼色因緣故有我相者是義不

然何以故眼中無我色亦如是而和合中亦復無我和合因緣生於眼識而是識中亦復無我因識生色名爲名色名色因緣生於六入六入因緣觸觸因緣受受因緣愛愛因緣取取因緣有有因緣生老病死等如是等法因眼識生而是眼識亦復不從十方而來所因之念生眼識者是念亦滅眼識不住於二念中亦不語念汝住我滅而是滅法亦無處所是故諸法緣合故生緣離故滅若因緣故生無緣則滅是故當知實無有我而是因緣亦無作受無有作者是故無我若無我者我所亦無是故眼性無我我所無合

無散卽是生滅一切諸法亦復如是一切法性無取  
無捨非諸聲聞緣覺諸佛之所造作如眼識空一切  
法空亦復如是作是觀時得空三昧門或得須陀洹  
果乃至阿羅漢果觀眼既然耳鼻舌身亦復如是觀  
身無我髮亦無我皮毛血肉筋骨膿髓腸唾暖氣上  
下諸風壽命名字皆無有我直以眾緣和合故名爲  
身身觸因緣故生身識識因緣名色名色因緣六入  
六入因緣觸觸因緣受受因緣愛愛因緣取取因緣  
有有因緣生老病死等如是等法因生身識而是身  
識亦復不從十方而來所因之念生身識者是念亦

滅身識不住於二念中亦不語念汝住我滅而是滅  
法亦無處所是故諸法緣合故生緣散故滅若緣故  
生無緣故滅是故當知實無有我而是因緣亦無作  
受無有作者是故無我若無我者我所亦無是故身  
性無我我所無合無散卽是生滅一切諸法亦復如  
是一切法性無取無捨非諸聲聞緣覺諸佛之所造  
作如身識空一切法空亦復如是作是觀時得空三  
昧門或得須陀洹果乃至阿羅漢果舍利弗若有比  
丘能如是觀眼身無我當知是人得三昧門爲諸天  
世人之所供養說是法時無量眾生過去惡業悉得

除滅無量衆生得法眼淨無量衆生得須陀洹果乃至阿羅漢果九萬四千衆生獲得如是淨陀羅尼無量衆生發阿耨多羅三藐三菩提心無量衆生於菩提中心不退轉無量衆生得如法忍無量衆生得破欲貪色無色貪無量衆生得隨空無相願陀羅尼無量衆生成就不淨觀無量衆生成阿那波那或得舍摩他或得毗婆舍那或得性地或得聲聞辟支佛法或得菩薩法一切女人聞已悉得轉於男身欲界衆生悉受快樂如三禪地爾時一切天人八部供養於佛歡喜而住

日密分中不思議大通品第五

爾時頻婆娑羅王白佛言世尊此世界中無量菩薩所可成就光明妙色我從本來初未曾見初未曾聞世尊是菩薩光能照一切娑婆世界若是菩薩近於阿耨多羅三藐三菩提者其光云何大王若有菩薩成就無上菩提道者其光能照十方世界何以故善法莊嚴諸功德故成就具足莊嚴法故一切善根多增長故以近無上菩提道故畢竟無上菩提道故受於如來正法果故分別演說無邊法故所可得身無罣礙故獲得清淨真實法故所可修集到彼岸故未

來世業已得盡故成就無量佛正法故能轉無上妙法輪故於一切法得自在故通達一切衆生根故永斷一切煩惱習故是故光明悉能遍照十方世界大王隨佛功德大勢力故亦能覩見十方諸佛王言世尊我今欲見十方諸佛菩薩聲聞爾時世尊告阿若憍陳如若我弟子聲聞之人在家出家是人各各深自思惟所有善法我亦欲入如來三昧若有人天得如實忍若有不退於三乘者如是衆生亦入於定復有衆生於三寶所得信敬心亦復如是入於禪定爾時世尊卽入三昧其三昧名一切佛境界行智廣如

虛空一切智者喜日月光明如是三昧聲聞緣覺及諸菩薩所不能知不能計量是名佛境界三昧如來入是三昧已娑婆世界百億四天下百億須彌山百億日月乃至百億有頂如是等土悉入佛身娑婆世界地獄餓鬼畜生天人有受苦者皆得除滅一切歡喜譬如比丘入第三禪所有一切菩薩摩訶薩悉從定起見佛光明見光明已自所有光尋滅不現一切聲聞所受快樂譬如比丘入第三禪爾時一切無量衆生悉皆自覩如來毛孔一一毛孔出無量光如恒河沙等日月光明亦如恒河沙十住菩薩所有光明

如是光明悉能遍照十方佛土爾時十方諸佛世尊  
各告大衆諸善男子汝等頗見釋迦如來大光明不  
如是光明成就無量無邊功德是光因於大慈大悲  
爲於憐愍諸衆生故是故今者示諸衆生大神變相  
一切衆生見是光已皆發阿耨多羅三藐三菩提心  
他方世界有諸衆生得神通者皆集至此娑婆世界  
其不得者遙禮供養爾時一切諸佛菩薩及聲聞衆  
皆悉來詣娑婆世界一切菩薩悉以七珍種種華香  
妓樂幢蓋供養恭敬尊重讚歎有諸衆生處佛身者  
皆悉見之見已復受無量快樂爾時娑婆世界一切

衆生同共發聲作如是言我等以是善因緣故願後  
共生一國土中令得覩見十方諸佛三惡業道已得  
消滅若有衆生見佛神變不發阿耨多羅三藐三菩  
提心者當知是人常行黑闇諸菩薩等爲衆生故受  
種種苦或化作佛或作辟支佛或作聲聞梵天帝釋  
四大天王那羅延像自在天像龍像鬼像阿修羅像  
轉輪王像若有佛界應以聲聞得調伏者現聲聞像  
如是等化自非十住不能爲也是故無上菩提之心  
成就無量無邊功德爾時一切諸佛身內所有衆生  
以偈頌曰

以諸惡心因緣故 流轉生老病死苦  
以不親近善知識 是故不能到彼岸  
若能遠離諸惡心 諸惡邪見惡因緣  
能斷三有生死者 是則能到於彼岸  
衆生難得於人身 得已值遇善友難  
篤信之心復難得 得已難得聽正法  
若有能發菩提心 是人能斷諸煩惱  
亦能教化無量衆 現大神變如今佛  
若能永斷二法者 所謂常斷二見等  
若見一切行無我 是人名爲善思惟

若能修習苦集諦

是人能斷諸煩惱

若能發起菩提心

是人則勝諸世間

說是偈已無量衆生發阿耨多羅三藐三菩提心復  
有衆生發緣覺心復有衆生發聲聞心或有衆生得  
無量陀羅尼復有衆生得如法忍不退忍如實忍或  
有獲得須陀洹果乃至阿羅漢果爾時波旬悉見娑  
婆世界在佛身內見已悲泣涕淚橫流心生愁惱若  
坐若起若行若立進止出入以手拍頭亦受苦惱乃  
至一切魔之眷屬亦復如是時魔波旬有一大臣名  
曰空樹見魔愁惱而說偈言

何故愁惱而獨行  
所至之處心不樂

其心迷亂如狂人  
唯願天王說因緣

時魔波旬復以偈答

我見瞿曇大神力  
內心躁動無安所  
覩見如來無邊身  
令我境界悉空虛  
十方所有諸聖人  
大設供養供養佛  
瞻覩如來大神力

是故生惱而狂行  
愁熱逼切及眷屬  
悉受一切娑婆界  
是故我今生愁惱  
悉來集會此世界  
是故令我生愁惱  
及見眷屬歸依佛

爾時大臣復說偈言  
我今獨行無伴侶

是故令我生愁惱

我今多有諸眷屬  
力能破壞如來身

其心弊惡具器甲  
及能毀壞大神力

時魔波旬復說偈言

我今眷屬深畏佛  
若欲生心毀壞時  
是時大臣復說偈言

云何能壞神通力  
則自見身被五縛

如其怨敵勢力大  
若知瞿曇有大力

當詐現親則可壞  
先當詐現親厚心

時魔波旬復說偈言

若我詐現親厚心

爲欲毀壞瞿曇身

卽見頸下繫死屍

爲一切人所呵責

是時大臣復說偈言

一切欲有是魔界

所有人天屬如來

願王切勅惡龍王

是能破壞瞿曇身

時魔波旬復說偈言

若汝審知龍有力

我已失心汝自約

若實能壞瞿曇者

我還得土及本心

爾時大臣卽便宣說告諸惡龍王汝當爲我壞瞿曇

身時諸惡龍將欲飛空而不能動卽語大臣敬奉來  
命欲往毀壞適生此心便不得去爾時大臣卽生怖  
畏作如是念我若今者現魔大力令諸惡龍心生瞋  
恚以瞋恚故則能毀壞瞿曇之身爾時龍宮有化死  
尸充滿罽塞諸龍見已自於宮室心不甘樂作是念  
言是誰化作此死尸耶雖復思惟莫知誰爲爾時一  
切四天下中諸大龍王及其男女大小眷屬卽出宮  
室至佉羅坻山其山平坦縱廣正等四萬由旬皆是  
先聖所遊居處七寶具成乃至難陀娑難陀龍王亦  
捨住處至此山中四大海中所有龍王及其眷屬無

量無邊伊羅跋龍王善住龍王龜龍王阿那婆達多  
龍王目真隣陀龍王德海龍王水德龍王舍德龍王  
樂德龍王阿波那羅龍王山德龍王牛德龍王伊羅  
跋多龍王長臂龍王長髮龍王淨龍王迦羯羅龍王  
水漂龍王黑髮龍王金色龍王舍拘龍王念彌龍王  
象龍王利牙龍王有行龍王疑網龍王長面龍王赤  
眼龍王樂見龍王如是等間浮提土所有龍王其數  
八萬并其眷屬乃至四萬四千國土所有龍王皆至  
佉羅坻山北鬱單越有二龍王一名無遍二名金身  
是二龍王與無量衆及四萬四千國土龍王亦至此

山東弗婆提有二龍王一名爲月二名婆私吒是二  
龍王與無量衆生及四萬四千國土龍王至此山中  
西瞿耶尼有二龍王一名寶髮二名光髮及四萬四  
千國土龍王至此山中及四天下四生龍王并其眷  
屬亦至此山是諸龍王其身皆如四寸藥根以瞋恚  
故身如須彌時魔波旬見如是等諸龍王已告其眷  
屬諦聽諦聽以我力故令如是龍從宮室出至彼大  
山悉失勢力不能毀壞瞿曇沙門爾時復有大臣名  
曰戒梯卽白魔言大王如是龍王爲欲破壞釋迦身  
故集會一處各作是念我今當以何等方便壞瞿曇

身波旬答言我有是事若審汝當往看爾時大臣與  
百千萬衆生欲往彼山爾時如來從禪定起坐於一  
面示現常身大臣既見如來常身在摩伽陀國見已  
卽作是念瞿曇沙門退失神通將不於我生怖畏耶  
欲於我所生大惡乎我應先至彼瞿曇所與共談論  
爾時大臣卽與大衆往至佛所而說偈言

汝身未度生死海

云何當能度衆生

瞿曇勿誑諸衆生

說言當得大涅槃

爾時如來復以偈答

我已得度生死海

亦得永脫一切有

我以慈悲因緣故

說言衆生當涅槃

汝已於昔無量世

發起無上菩提心

已曾供養無量數

百千巨億諸世尊

汝今定當得佛道

云何言我誑衆生

我今施汝大念力

便可至心觀本身

爾時大臣聞是偈已卽自觀察過去本身了了明見  
發菩提心供養無量無邊諸佛見已卽時心大慚愧  
於如來前頭面著地懺悔作禮白佛言世尊我今已  
憶無量世中發菩提心已曾供養無量億佛於諸佛  
所聽受妙法已得修行六波羅蜜世尊迦葉佛時有

一比丘說聲聞乘我不思惟便言是語非是佛語魔之所說是人已發菩提之心行菩提道以是因緣迦葉如來不授我記我因是事生於魔界受是身來已經五萬七千億歲世尊我寧以是過去等身受地獄苦終不退於菩提之心佛言大臣善哉善哉若人以金如須彌山并七寶物於無量世供養於佛其福不如發菩提心何以故發是心者乃是供養十方諸佛爾時戒梯菩薩卽於座上得如法忍從坐而起頭面作禮繞佛三匝以身上衣服供養於佛乃至四萬四千大衆亦復如是時魔波旬見其大臣及其眷屬已歸

依佛心生苦惱牢閉門戶卻坐一面爾時世尊卽爲大衆說三種慈所謂生緣法緣無緣如虛空目中之所宣說爾時一切諸天龍王悉皆集會佉羅坻山先聖住處欲動不能欲行亦然欲現大身而復不能尋向難陀婆難陀王而作是言大王先者所作臭穢死屍皆是波旬之所爲也是故令我悉來至此受是小身若能歸依魔波旬者可得解脫爾時伊羅跋羅龍王言魔王今者喪失本心及其神足云何當能救濟汝等爾時龍王或有歸依四天王者或有歸依忉利天或焰摩天或雙術天或化樂天或他化自在天或

梵天等爾時海龍王卽作是言汝等不見釋迦如來一切賢聖人天雜類大設供養而歸依耶爾時或有龍王歸依那茶仙人或馬藏仙人或皈廣仙人或光味仙人或跋伽婆仙人歸依如是等五種仙人是五仙人悉得五通住於雪山悉在光味大仙人所聽受正法光味菩薩亦以種種無量讚歎讚歎如來爾時仙人悉聞一切龍王音聲聞已卽曰光味仙人頗聞諸龍哭聲不耶答言已聞大士唯願往彼救濟其苦光味答言汝等可往我不得去所以者何今有大天欲得聞受無緣慈故時四仙人禮拜光味往佉羅坻

山而救濟之諸龍見已卽各舉聲求哀求救仙人答言我不能救彼雪山中有一菩薩名曰光味彼能救拔吾等不能汝當一心求哀作禮時諸龍王各自同聲向彼作禮爾時光味聞是聲已與無量諸天大眾至佉羅坻山龍王見已頭面作禮唯願大士救我等苦爾時光味菩薩知時已到欲說星宿爾時大海龍王曰光味菩薩言大士是星宿者誰之所說誰作大星誰作小星誰作日月何日之中何星在先云何滿月云何爲時如是星宿繫屬何天性是何等何輕何重何善何惡何食何施誰造此晝誰作此夜影有幾

步名曰爲轉云何南轉云何北轉大士汝於諸仙最爲第一唯願具足分別解說爾時光味菩薩告諸龍王大王先過去世賢劫之初旃陀延城其城有王名無量淨正法治國不貪欲樂常樂寂靜才智聰達王有夫人欲心發動與王遊行在一林中貪心視王卽便姪身是時夫人時滿卽生其兒頭耳項眼脣口悉皆似驢餘分似人其母見已卽生怖畏擲之廁中身未至地是時驢鬼於空接取往雪山之中瞻看哺養猶如生子時雪山之中有苴美藥驢鬼採取以食是兒是兒食已身則轉異有大光明福相具足智慧慈

悲以是因緣諸天禮拜供養讚歎爲是兒故於雪山中有諸種種藥草果蓏餘相悉轉唯脣似驢是故名爲驢脣仙人於六萬年受持禁戒常翹一足一切梵天魔天帝釋大設供養而供養之皆悉合掌曰驢脣仙人欲求何願唯願語之若我力能我當施汝仙人答言我今欲得了知星宿爲衆人故心生憐愍一切天言若爲憐愍一切衆生欲得知者願當說之仙人言梵天我實不解最初宿說是星時諸大龍王於光味菩薩心生歡喜爾時光味菩薩爲諸龍王出微妙音讚歎三寶又作是言我今真實不能救拔汝等苦

惱唯有如來釋迦之尊乃能救之釋迦如來爲欲調  
伏諸衆生故於無量世能捨所珍修習慈悲爲救苦  
惱爾時一切龍王男女大小至心念佛讚歎歸依南  
無世尊於衆生中最爲殊勝一切法中心得自在於  
諸法海已到彼岸能救一切衆生苦惱施其安樂平  
等無二憐愍一切能示正道惠施正眼一切天龍之  
所供養能受一切十方世界所有人天微妙供具世  
尊我今多受無量苦惱唯願慈悲少垂救拔是諸龍  
王心念佛已尋自見身如先無異時光味菩薩語諸  
龍王如來功德不可思議爲衆生故於無量世修行

具足六波羅密說三慈悲調伏衆生說一切法無我  
無作說陰入界四大煩惱說煩惱性及衆生性說一  
切法無性無相無礙無作無垢無淨無明無暗無取  
無捨無行無住無一無二陰入界等及以四大亦復  
如是名第一義空是故如來能調衆生爲無上尊是  
故如來能拔汝等無量苦惱

日密分中救龍品第六

爾時世尊告光味菩薩善男子汝今欲聞諸龍業不  
光味菩薩白佛言世尊今正是時唯願演說佛言善  
哉善哉善男子至心諦聽當爲汝說爾時一切天人

以好香華妓樂旛蓋供養於佛爾時世尊與欲色界一切諸天無量聲聞及菩薩衆從摩伽陀國趣須彌山爾時梵天設七寶座以待如來復有造作七寶街道是時梵王作如是言唯願如來經涉此路坐我座上爾時他化自在天復以閻浮檀那寶造牀及道亦言如來願行此路坐我座上爾時化樂諸天復以天金造牀及道亦言如來願行此道坐我金牀爾時刪毘術陀天復以天銀造牀及道亦言如來願行此道坐我銀牀時夜摩天復以瑠璃造牀及道亦言如來願行此道坐瑠璃牀時忉利天復以真珠造牀及道

亦言如來願行此道坐真珠座時四天王復以瑪瑙造牀及道亦言如來願行此道坐瑪瑙牀時四阿脩羅復以梅檀造牀及道亦言如來願行此道坐梅檀座爾時世尊心憐愍故作佛像遍行六道遍坐六座以如來真身處在梵王所設道座一一化像皆有無量聲聞菩薩以爲眷屬一一化像所有光明猶如無量日月光明是諸龍王見化像已心生恭敬各作是言今須彌山乃至如是千日月耶難陀婆難陀言如來世尊與無量梵天趣須彌山是其光明非日月也汝等若欲得解脫者應當至心專念如來如來世

尊已壞無明是故今有如是光明阿那婆達多龍王  
言是光明者是魔所有非佛光也何以故一切欲界  
屬魔波旬故是魔波旬能作是惡波旬今者憐愍故  
能救如是諸龍王苦或有說言如此乃是化自在天  
化樂天兜率陀天夜摩天忉利天四天王等以憐愍  
故能救如是諸龍王苦善任龍王言是光明者卽是  
光味菩薩光明以憐愍故救諸龍王苦寶髻龍王言  
是光明者乃是出家剃除鬚髮大德人光以憐愍故  
救諸龍王苦海龍王言是光明者是如來光何以故  
以憐愍故如來世尊於諸衆生修一子想能救衆生

一切苦惱於無量世修行具足六波羅密唯爲救濟  
一切衆生無量苦惱是故一切欲色界天設大供具  
而供養之爾時世尊告帝釋言憍尸迦如我遊此娑  
婆世界爲化衆生如汝在於三十三天爲度諸天憍  
尸迦言世尊我今未有無邊之智云何說我能化諸  
天世尊是須彌山有無量天無量梵天無量鬼神無  
量乾闥婆無量緊那羅無量迦樓羅無量阿修羅無  
量摩睺羅伽無量諸龍無量大仙無量聖人唯願如  
來以憐愍心化度如是無量衆生爾時世尊熙怡微  
笑無量色光從其口出青黃赤白玻黎雜色遍照十

方幽冥之處勝無量億梵天光明無量億數釋天日月能壞一切諸惡魔業爾時世尊告帝釋言憍尸迦娑婆世界所有諸山須彌爲最我亦如是於諸衆生最爲第一爾時一切龍王聞是語已各白佛言世尊唯願憐愍救我等苦佛言諸善男子汝等先當至心念佛我當救之爾時世尊告憍陳如其音遍聞十方世界憍陳如一切諸法悉皆無常一切諸法生住無常何以故生因緣故一切因緣生法卽是苦也若法生時卽是苦卽是癰瘡卽是有支卽是生老卽是生滅憍陳如眼卽無常若眼生者卽是苦卽是癰瘡卽

是有支卽是生老卽是生滅乃至意亦如是憍陳如若眼滅者卽是生老病死等滅卽是一切有支滅乃至意亦如是衆生不知眼之生滅是故流轉在五道中如來爲斷眼生滅故而演說法亦爲說苦斷苦行法是故如來是梵中大梵天中大天象中大象是沙門中大沙門婆羅門中大婆羅門慈中大慈悲中大悲無上之尊爲大丈夫已到生死大海彼岸最大福田無勝施主其心平等爲大法王持大禁戒無上精進善修梵行了知正道爲大導師通達餘業憍陳如善知眼之生滅因緣故名如來不了知故名爲凡夫

云何不知名爲凡夫僑陳如一切衆生皆說有我是故不見眼生滅相輪轉五道僑陳如有諸外道說言見者名之爲我乃至知者是我眼者卽是我之因緣乃至意者亦復如是僑陳如諸外道說眼喻於向我者喻見若如是者是名顛倒何以故所言見者卽是和合於和合中而生我想是故顛倒若言向喻於眼見喻我者是義不然何以故向中見者亦見亦聞亦識亦觸眼不如是是故見者不得名我向雖久故見猶明了眼若久故不得如是我者名常若我見聞我則無常若無常者云何說我僑陳如衆生以是顛倒

因緣不見四諦如來了是顛倒相故名爲正智我者卽是如來若有能知如來我者是人則能壞顛倒相若壞顛倒則破魔業若破魔業是人則能救拔諸龍僑陳如是故我今能救諸龍

大方等大集經卷第三十

音釋

卷第二十八

唼嚙入口也亦作走

捷椎

地梵語也凡集僧擊鐘磬各捷椎

圓清

氾

二音

臆隆

鞞皮

唼丘爾切

鄴毗必切鼻

第十三紙

一行第

南藏作

紙

十

本紙六行其醞疑脫又十行其浪摩浪疑

又十二行施陀室室疑有

又十六行閣提力摩疑脫

第十七紙七行南藏作

第十八紙十二行卻比疑是比御考日藏

本紙二十行貪欲二字

卷第二十九 抓爪緹提菰裸蔓生

蟒莽大電薄澍漂齧摩噬

第六紙三行南藏作呀

第八紙十二行餓鬼二字南藏作衆惡

卷第三十 𡇗炒糗𡇗剌遮坻邸

當湖馮洪業募貫續鑄

法藏方冊願周法界縑白四衆成滿

如來四弘誓多嚴性德究竟圓覺願多生父

母咸被資薰證入法流誕登覺岸俾業乘願

入死出生不迷本性具足正知又願


藏教遐訖聲光縣緲見聞成種依正互融民風

侯世徵書

祁學軻梓







二四  
十

二四  
十

二四  
十